



如阜縣志

ル 5
3280
4



凡 5
3280
卷 4



如臯縣志卷九

學校

學制 書籍

崇祀 書院

禮儀 社學

義學 附並

圖 學額

學田

贊治化而維風教者人材也養之有其地董之有其人
建學立官陶成者至矣況自安定以來明體適用臯固
源遠流長者哉志學校

學制

南唐保大十年始建學於縣治之東北隅即今中禪寺地
其規制姓氏不詳

宋大中祥符八年縣令曾易占建大成殿教堂

紹興初遷學於縣治之西南隅

淳熙三年縣令趙善瓘修元季燬於兵今胡安定祠即學

如臯縣志

卷九

學校

昭和十八年
八月十八日
購本

之舊址

明洪武三年知縣謝得民創建明倫堂東西二齋

十一年知縣劉國衡增修

十五年知縣周公鼎重建

宣德八年典史蔡寧修大成殿

正統七年知縣曹立增建櫺星門兩廡講堂齋舍厨庫會
饌堂觀德亭

侍講周敘記略如臯揚之泰州屬邑昔賢胡安定先生
之鄉也地僻俗淳士生其間說禮義敦詩書舊矣儒學
在邑治西南故址迫隘環學室廬歲久傾敝僅庇風雨
正統丁巳臨清曹侯立周覽學宮徘徊增慨率僚友捐

俸倡修之首門廡次講堂次齋舍厨庫以及會饌之室
觀德之亭嚴嚴翼翼各以序焉有未備者府判靜海王
公益偕同寅復募民助充之惟大成殿則前監察御史
崇陽蔡寧左遷爲典史所修也殿之西南隅有安定祠
選胡氏後人充弟子員奉祀事監察御史歐陽彭公最
命曹侯所建也始於正統辛酉六月訖於癸亥十月葺
之非一人而曹侯之功居多焉竊嘗求之孔子之教曰
文行忠信曰明德新民安定之教則有體有用有文皇
士當熙洽之時有聖賢祠廟爲之瞻依尚益尊彝教以
求深造乎道無負國家育才致用之意不其躋與

成化五年知縣王倫修大成殿建明倫堂葺兩廡櫺星門

如皋縣志 卷九
齋舍立科目題名碑

侍讀彭華科目題名記畧吾友王克彝爲泰州如臯令
期年蠹剔害弛廢舉頽興尤悉心學校作明倫堂新大
成殿葺兩廡若櫺星門若生徒齋舍巍然炳然士知所
勸而民不告勞監察御史天台陳君至周視之喜克彝
能舉職也曰盍伐石題鄉邑古今賢達人姓名以示激
勸乎克彝曰然乃徵予記之泰古吳陵郡自昔有聞人
胡安定瑗王龍圖覲實天下之望也安定教授蘇湖嚴
條約以身先之爲文章皆傳經義敦尙行實後爲太學
四方歸之庠舍不能容去而爲名臣者不可一二計龍
圖立朝侃侃劾奏蔡童輩偉然有大節其爲潤州以歲

旱蠲租雖忤使者不恤知蘇州誅奸吏有吏行冰上人
在鏡中之謠在都府疏鑿舊渠以便民所至有惠愛夫
胡之善教王之善政在天下皆可以爲師法而爲邑令
佐於斯爲學師於斯者顧弗感發而興起乎宦遊於斯
者尚有所感發而生長於其鄉者顧弗景仰先哲爲之
惕然動心志乎夫觀其名慕其賢使人有所感動而無
待乎號令刑法亦可謂善政善教已陳君名選字士賢
克彝名倫克彝字也

七年知縣蔡彝教諭周鼎修

十四年知縣向翀復修大成殿兩廡重門明倫堂進德志
道二齋易木主以像重製祭器

禮部尚書周洪謨記畧通江向九霄宰臯之又明年撤大成殿而新之肖聖賢像修兩廡構重門以及明倫堂進德志道二齋亦皆繕治加於舊規神庖神庫籩豆簋簋諸禮器率重製如式又市民地以拓學門之路門之外左右各峙桓表又建胡安定祠於學宮之西凡諸費不以煩民經始於成化丙申春而落成於戊戌秋嗚呼興學校以敦教化道之所由明也天下郡縣皆樹學宮置學官使士子卽遺經以求道而又崇孔子廟貌使有所瞻仰矜式凡遊學者日絃誦於宮牆之下如當時孔門弟子從遊乎洙泗之間亦何幸哉然必潛心經學以窮道蘊退而反求諸身以仁其親以敬其長言而道焉

則言以信行而道焉則行以謹道積厥躬達之於用斯學爲實學才爲真才上不負朝廷教養之恩次不負有司勸相之意矣九霄講道有獲而以之施於有政者如此可不謂豈弟君子還不作人者乎時贊其事者縣丞陳箴主簿馬寧而董其役者耆民張文綱也

副使高宗本記畧成化戊戌之秋畧如臯儒學餘杭陸先生以書告予曰如臯舊學草創於立縣之初在縣治東北至宋大中祥符八年太常丞曾易占知縣事始建大成殿教堂紹興初復移建於縣治之西南元末兵毀國朝洪武庚戌詔天下郡縣皆立學知縣謝得民乃建明倫堂東西二齋爲講肄之所後知縣劉國衡周公鼎

如皋縣志 卷九
四
皆相繼增修至正統間知縣曹立而後大備歲月滋久
震風凌雨不無頽圯成化乙未冬向侯紳撤大成殿而
易以巨材肖聖賢像籩豆壘爵諸祭器之缺失者皆更
造之櫺星門舊以木爲之不久朽壞則易以瓦甃而保
其堅久戟門常患其卑隘不稱則廣拓其址而致其崇
高又設致齋所於戟門之東以備祭祀之齋宿立先賢
祠於戟門之西以爲後學之瞻仰神厨臨巷卑陋不潔
則移之與神庫相麗以便祭祀之烹宰學門東向淺狹
無規則改爲南向與櫺星門並峙而稍東號房不足又
蓋造十餘間於明倫堂之西以充學者之肄業路道狹
曲則又買民間隙地而闢之凡此興作皆向侯以均徭

餘積經營於其始其一應鳩工庀材之費則皆隨時區
畫初未嘗勞民力傷民財而求其速成也夫學校爲毓
材之地人材爲致治之本國家垂統百餘年而雍熙太
和之治足以比隆唐虞三代者以明明在上穆穆布列
者之得其人也何者而非學校之所造就哉蓋毓材於
學校所以養其德明其道修其文舉而用之推而行之
可以齊家可以治國可以平天下此有志於爲天下國
家者未有不以學校爲事也余旣聞向侯之重學校而
喜其得爲政之先務又見陸先生之重向侯而喜其識
爲治之大體故爲記之如此

嘉靖四年知縣梁喬升修

如皋縣志 卷九 五
十九年巡鹽御史吳悌焦璉知縣黎堯勳移建於舊學東
半里許創葢大成殿東西兩廡明倫堂齋館號房射圃亭
峙以戟門櫺星門內鑿泮池立職官題名碑此今之學宮
也

尚書湛若水記畧聞之人傑者地靈然地靈者亦人傑
其感應同也舊學地卑以隘莫稱高明廣大之教或曰
學東半里許有名宦鄉賢祠隙地乃東嶽廟廢址其土
燥其址高四尺中有古杏一株杏壇之兆已默定矣南
數十步爲龍遊河河九十九灣南出大江北爲運河紆
徐縈迴東入於海地勢坤風氣萃乃爲稱之因以舊地
易之前爲文廟廟如制左右爲兩廡又前爲戟門去廟

十丈又前爲櫺星門去戟門十二丈兩門之間有泮池
池有橋亘一丈後爲明倫堂左右爲齋爲館又爲號房
爲射圃亭其規模則穆穆乎若增而深遠矣其屋宇則
巍巍乎若增而高大矣然而爲廟爲學同也學以敷教
廟祀以報本同也院縣協孚政和教行羣工歡騰於肆
多士懽頌於庠其心又同也往來古今之通六十年之
遠也上下尊卑之殊其土其民之億萬之衆也其翕然
願爲斯舉者何心哉其宇宙感應之同然者也其萬物
天地一體者也昔者夫子生于魯轍環於列國北不濟
河南不及淮雖有浮海居夷之想而不果足跡未嘗掩
維揚之墟今之祀報師法乎孔氏者盡河以北淮以南

極天所覆地所載以莫不然不期然而同然豈特維揚已哉於是有所以悟天地萬物同體之理而得其所以同然之心必自知聖人之所以爲教在於斯有天地罔極之恩焉其能不報祀於無窮乎知學者之所以學在於斯有宇宙一體之意焉其能弗自強不息乎

祭酒鄒守益記畧臯學舊在西南隅地當下流泮池莽如湖蕩澇則灌於學宮宮日圯諸師生兢兢然欲徙而費鉅工繁莫或任之嘉靖己亥秋侍御疎山吳公悌慨任其責發兩淮運司罰金九百餘兩以屬於黎尹堯勳曰予倡之子其和之或議塞泮池之半遷廟而前之諸師生瞿瞿然不安也曰址弗堅其何以永縣東南隅嶽

廟舊址介鄉賢名宦祠間形勢爽塏風氣完固若貿舊學以佐新費可以不擾而濟復請於侍御范溪焦公璉公曰因舊弗堅孰與創新可久仍移預備倉以拓其址於是黎侯遴能以鳩役傭力以紆工稽程以祛蠹殿廡堂齋門寢祠亭及師生廨號咸次第如制式麗以鞏始於嘉靖庚子三月成於十一月朔合師生而落之南離東廓子守益曰二三子之新其學也其視諸學宮乎居下流以受澇則衆兢兢矣填淤淖以建役則衆瞿瞿矣徙高就剛式麗以鞏則衆訢訢矣若移是以切磋慎獨之學報倡以和慎終以始奚患其蔑濟乎世之獵經史組詞華以媒時好決短垣而潰之將非居下流以受圯

乎矜事爲急功烈內蘊詐力而外覆以仁義將非填淤
淖以建廟庭乎二三子其毋自安焉戒慎恐懼須臾不
離力振舊俗而新之則蘊爲天德發爲王道可以參兩
間而覆幬百世豈惟二三子無惡於志其於聖代敷教
之休良師作人之績庶曰永有賴乎

教諭吳元職官題名記畧臯學舊無題名碑嘉靖庚子
黎侯樂溪慨舊學之卑隘毅然改遷謀諸詹君亦沂何
君學丹始命工伐石以紀其名夫名也者生於實之有
餘者也顧而思盡其實吾輩之志也且國家之遴選教
職也試之春官試之天曹試之大廷然後拔其尤者授
之官其選任之重如此旣任之後諸司紀其德行錄其

道義或獎之旌之或疏其名而剝薦之其禮遇之重又
如此夫上之人旣重之下之人獨不自知其重乎立厥
德以重其趨淑厥教以重其任子弟之善者成之不善
者威之毋詭俗以爲通立異以爲能毋僞廉以取毋僞
忠而要毋僞避利祿而以薄媒厚毋僞鄙官卑而以謙
飾詐相與砥礪以表率髦俊興禮讓之風敦孝弟之行
正朝廷而正天下庶乎三代之遺矣否則後之人考其
名而指之曰某也賢某也不肖某也取重於天下某也
不爲人所重其榮辱爲何如乎

二十一年巡鹽御史胡植修

二十九年知縣陳雍修

三十二年巡鹽御史黃國用次第增修

大學士李春芳記畧臯學缺陋未飾觀者惻焉嘉靖壬子冬侍御黃國用按其土謁先師孔子迴瞻宮宇而嗟曰是焉足以嚴安祀安絃誦哉矧陰陽向背多舛其宜乃捐罰鍰若干金召節推符君允中畫而示曰是宜革是宜創是宜闢是宜塞宜崇而坵宜濬而流符君受命惟恪率邑令陳君雍庀材鳩工相度經紀葢五閱月而緒甫就規制煥然改觀矣既落之日章縫悅懌黎庶歡踊有魯泮水大小從邁之盛焉予惟教化治道之所先也故有匡世翊道之志者恒注心焉文翁之在蜀倪若水之在沐范純仁之在襄邑率興學廣教以隆化理後

世述頌不衰黃公之用心豈異昔賢哉然興學闡教以作材弼理者上之責也崇德邁行以強學待聘者士之責也爲士者嘗慨上焉者無其人矣今將誰咎乎孔子稱十室之邑必有忠信不如某之好學如臯僻在海隅習尚淳厚士多忠信之資抑有好學如孔子者否乎孔子之學非攻藝射名之謂也所以學道也盡其性以盡人物之性以贊化育以參天地孔子之學也發憤忘食樂以忘憂不知老之將至孔子之好學也轍環齊魯之墟席不暇煖孔子濟世之心也今之學果如孔子之學與所以濟世之心乎惟藝是攻而無得於心性惟名是急而無裨於天下國家甚之營私蠹公毒痛細民并其

所謂忠信者亡之矣夫天下之治忽繫人才人才之邪正繫學術孔子之學不明則忠貞之才不出欲求海內又安難矣今黃公以正學倡之於上異時有好學之士卓然爲天地立心爲生人立命俾孔子之道大明宇內謂非公之力哉

三十八年知縣童蒙吉重修又拓學前地十二畝六分有奇以廣明堂氣象恢宏規模濶大

萬歷二年七月學爲風潮毀塌四年知縣鄭人達修始築宮墻

祭酒姜寶記畧安定胡先生故如臯產也趙清獻公閱道則斯邑舊令君也援安定之教以新舊俗而先躬行

又援清獻公之崇學校禮師儒以勉進其爲令長者則東郭鄒公與郡先輩太僕蜀岡盛公少師石麓李公亦嘗後先相繼記之矣茲焉修葺乎癸丑以來所頽損而未備復徵予言也予言其能有加於諸公也歟雖然請舉諸公言所未卒者申言之孔子設四科以教門人遂爲萬世立教之宗主後代師傅稱最得孔氏法門者莫如蘇湖而蘇湖之置經義治事二齋若專爲文學政事而設科也而德行言語之誘掖固亦默存乎其中矣當時及門如孫莘老范忠宣輩純明直溫各有所表著而立朝言論風旨若王明叟兄弟則所謂善爲說辭者其陶鎔當亦有所自也然則安定之教不誠善矣乎今之

司教者課書升散之外無聞焉甚則併課書升散亦廢矣今之教於學者口耳詞章之外無取焉甚則併口耳詞章亦荒矣中間有高於人者自謂直指此心言下領悟往往外人倫遺物理罕格致誠明之功緒而但以談元吐奧爲勝及其出而仕也旣無濟於用又欺世而弋名人往往慕效之而不知其非也於戲做也久矣故予嘗謂課書升散以爲師庸師也口耳詞章以爲儒俗儒也此爲學舍之蕪陋而已矣外人倫遺物理但以談元吐奧爲師儒而實則無濟於用乃師儒之空疎而自文者此爲學舍雖設徒飾外觀而已矣若夫竊講受之名以欺世者此假學舍之修以叨有能名而究其歸則朽

木而雕黑黃蒼赤而不以法故第毀瓦畫墁之徒其志將以求食焉爾夫國家建學以教士養才邑令君奉行國家德意以修學而冀以教士養才也其又何用有此歟今臯學遷矣陰陽向背補飾其缺漏矣若殿堂若齋舍若門若坊旣修葺而備矣師必無愧於蘇湖其弟子必無愧於安定之弟子鄭君之留意學校與師儒也又不愧趙清獻之令臯豈不咸有以永終譽也歟

九年巡鹽御史任養心修

十年署知縣江都教諭馬晨修補築迤北磚牆會受代去工未竟東北一帶尚仍舊土

二十三年知縣陳煥修

二十八年知縣張星修

三十年教諭黃夢麒移泮池於櫺星門之外建東西二石橋曰文德武德

修撰朱之蕃記畧初櫺星門闕地沼焉以爲泮駕二石梁其上然泮無蓄水若坑阱然形家數言不利於多士黃野王先生曰相厥地宜面河流而環帶泮自天造安用此坑阱爲則有白下之制可做也於是請於縣大夫蘄州張公比諸御史臺咸報可乃賦丈度費庀材撰吉鳩工興卒堙舊坎而夷之泮則徙而外因於河造雙梁於左右費凡若干緡肇工於萬歷壬寅秋越甲辰夏乃報竣事則張大夫遷而今邑侯惠安陳公繼成之也雙

虹對峙兩厓甃石內夷坑阱爲坦途外布石欄臨活水蓋魏乎大觀云橋成之明年乙巳先生遷分宜令往矣泉大夫士謀紀石而問記於余余惟橋富平而民利涉功德至今不泯千古如一日也然慮始最難故富平之役成人主乃舉酒勞元凱曰非君不能成此野王以一廣文而倡是舉乃有成績則又難之難者

邑人冒日乾記畧我阜左溟渤南大江學海文瀾襟控前後淮流自北折而東二渠紆洄環城內外若縈帶而學宮翼然臨於渠上苞孕靈淑洵扶輿之勝概也因渠爲泮秀若天設而乃甃池於櫺星門內若蹄涔然士議徙之久矣頃奉中丞檄飭治學宮士復持前議念方告

紉不敢重糜帑金僉願捐貲從事而鄉先生之奮迹膠庠者亦慨然有水木之思樂輸以佐之而邑大夫某愷悌作人嘉與多士更始爰庀材量工白狀當路而後徵惠先夫子之靈蓋荷畚待命者麋集而成且以不日矣仁侯右文明師造士而賢士大夫相與共襄厥美君子謂是舉也恢廟貌闢風氣模緒宏遠矣

四十三年知縣李廷材葺櫺星門東西兩廡西齋

四十五年知縣熊奮渭修明倫堂西廡

四十八年巡鹽御史蔣以化檄建尊經閣

大學士葉向高記畧夫六經之傳於世也猶之乎二曜五行之運於天也何臚何魄何若木何崦嵫何生尅虛

旺若者紛紛之說乎殺之爲畫鳴之爲籟錯綜之爲文字緣飾之爲經緯條晰之爲是非故時灰於秦燄錮於魯壁經不見阨也旣鐫之蘭臺講之白虎誦之郡國校之天祿石渠經亦不見榮也夫經固自尊耳學聖人者烏得而不尊之夫宣尼以天縱之資彙千聖之統其於經也且雅言焉筆削焉韋編三絕焉今士人授一經童而習之各學一先生之言於他經輒目爲駢枝彼此不能舉其概且於其所授一經亦僅訓詁帖括以應功令而取世資叩之以實用茫如也此惡在其尊經哉然則士子之尊經亦尊之以心足矣奚必以閣曰聖人卽心以爲經者也而凡人則借經以惕心人處幽黯之室無

所不恣焉登明堂入清廟而神勃然悚矣手斷蠹之編
 覆甃代枕無所不忽焉開牙籤觀細帙而心凝然肅矣
 今竺乾苦縣兩家弟子崇奉師說且必居以琳宮紺宇
 飾以金函玉笈朝夕齋心祓手而後敢啓吾儒轉弗若
 乎此非以閣尊經也欲以閣而惕人心使知所以尊也
 臯學舊未有閣學博蔣君欲大創之以告邑令李君李
 君曰是吾任也遂與蔣君約一切經畫規制出納教護
 悉以厘蔣君而李君則爲升嘉肺之金以佐工餉閣楹
 五高六十尺廣袤稱之下軒廠可布百餘席課諸生其
 上八窻瀕洞左右列朱櫝受經及諸史籍之翊經者閣
 成李君顧而悅之憑闌遠眺爽然有鴻飛天際之思焉

曰是可以尊經矣

按文中學博蔣謂蔣紹
 燿邑令李謂李衷純

天啟三年知縣李衷純增修大成殿東西兩廡櫺星門啟
 聖宮

大學士朱國禎記畧夫學所由來昔矣三代以上大道
 元同家詩書而戶絃誦負鋤耒枝之士莫非譽髦先王
 猶必設之膠序董之師儒其經制何宏遠也明興統一
 教化聲洽寰宇郡邑之士慮無不爭自祓濯以希光於
 日月而有司視先師鐘簋之地直若彼黍之宮旣屋之
 社卽有念水木而重賢關者亦惟是畫丹塗堊以幾映
 一時之耳目云爾其爲造無斲規不朽者誰其人與元
 白李公爲令東臯以治行特聞月一再行學宮顧瞻廟

如皋縣志 卷之九
四
貌歛垣朽棟不蔽風雨乃盡撤其舊而增廓之不半歲落成於是進諸生遊肄焉公時與上下揚扝甄拔其所材循誘其所不及格臯人士益激揚鼓勵思以若於雅化將邁羽天衢相嗣而登金馬石渠之署者歲常不乏今天子冲聖旃厦之學與湯銘俱新方且筮日戒蹕行臨雍釋奠之典而郡邑之吏能先意獎順於以粉黼太平藻潤宏業助聖天子同文之化詎非賢有司之事乎茲三陲告變中原之盜蟻合蜂聚而維揚一隅謐然奠安三靈叶調萬寶登熟雞犬桑麻安堵無擾謳吟絃誦之聲自闐闐以達村墟必非無因而致也詩曰旣作泮宮淮夷攸服噫蓋我先師之鐘虞實式靈之矣

國朝順治十四年知縣崔鳳賓修

學政張能麟記畧揚之東臯江海裔壤也而安定胡先生實篤生此慶歷間教授生徒東南俊秀翕然以理學爲宗天子至下湖州取其教法以爲太學程至今俗尙節誼彬彬乎質有其文藏修游息莫不於泮宮卒業焉舊制宏厥一經兵燹日就傾頽無復起而修之者予特捐俸百三十緡爲之倡邑宰崔君鳳賓及邑之賢士大夫輻輳慕義而學博亦能出其脯脰之資拮据督課及期工竣學博請予爲之記予惟學之不修也久矣始以時絀費鉅懈而不修不修則廢廢則不可修而愈難於修天下類如是而修之則竟修矣天下事有不可爲者

如皋縣志 卷九
哉昔西山真氏以修學之義譬之爲學今入其廟而見夫棟梁基構崇隆而堅固也可以知學之有本矣簷楹榱桷鳥革翬飛可以知學之有章矣不煩公帑不役細民可以知四端在我求則得之不少欠闕矣顧乃曠而不居舍而不由放而不之求可乎今者廟貌維新藏修遊息不患無其地矣而予猶復有勉焉者讀聖人之書要知義理之所在義理旣得發爲文辭其文辭必靜深而可久然非言之難而行之難亦非行之難而合於聖人之爲難有本資之以立德有章資之以適用其於修學之義不相發明也哉安定之澤未艾也多士思無負

聖天子崇儒重道之意當於是勉之矣

邑人石璜序畧自古郡邑莫不有學雄偉焜耀嚴嚴翼翼多士揖讓其中摩揉徙革日底於善而教者以勸掖之意須累積之功以待學之就則人心純材之成則士習正而朝廷得人豈非其游息有所鼓舞不倦也哉然而歷年久遠學壞且廢當事者憂然不顧多士不知所趨而人之體性容止惟其所肆治事經義之學無復淵源可考卽有茂敏純厚之士而無薰陶之漸則其學之不就材之不成無惑焉已矣臯學承變革之後遷延不修而規模如故嘗爲周覽瞻眺有堂有殿有藏書之閣有棲士之舍園橋壁水龍游玉帶蜿蜒迴繞文峯矗聳雙虬偃仰氣象宏麗宜茲多士代有名賢如安定之正

如皋縣志 卷九
學龍圖之直言忠節之大義又其尤者夫非此學之所
造就哉然顧廊廡傾頽殿角圯謝北地崔程二公來蒞
茲士學將賴以一新而二三君子又相與踴躍而躬先
之僉謀費出同學無外求者則材有不賦而就匠有不
鳩而集功有不迫而成矣夫當積久圯壞之學有工費
之活人力之艱固非創建所易致者惟其令之一倡而
三百餘人莫不響應而圖之如恐不及且不遺餘力而
奎閣迴樓園橋壁水環抱固結風水涵毓及觀其成諸
生日講習不輟順其愛慕發憤之心養其醇和溫厚之
性以進於修身齊家經國平天下之大務必有名儒高
第崛起其間而垂德業於永遠也豈不偉哉

康熙十年邑人蘇世威募築宮牆易土以磚知縣趙方化
重修東西兩牌坊

十三年邑人吳伯遠胡邦棟姜迂譽冒起蒙請復學前射
圃創建屏牆

請復射圃碑記畧如臯射圃舊在學宮內後以其地爲
教諭署因移置泮水之南而以屏牆蔽之牆南有仇信
學地十二畝六分有奇自牆直至南城下歲月旣深居
民視爲閒地或潛跨而有焉始於尺寸漸而尋丈實逼
處此侮聖人而蔑王章愆莫大焉好義之士冒起蒙姜
迂譽胡邦棟聯名籲請於學使簡虞二憲行縣清占以
示永久復斥資築泮池前宮牆十有二丈

按明教諭呂克孝學圃小記明堂空地原奉海道明文創置入學東西兩旁今屬勢家日漸侵蝕蓋屋阻塞屢諭不聞今自吳伯遠等請復後又百有餘年矣

童志載儒學前地北一段原係生員何諍等五家地共計十畝八分三釐五毫東長五十八弓止仇信地界西長五十二弓止新填通江河西崖外及馬應禎地界南口四十六弓半止溝中學地界北口五十二弓止官河南一段原係省祭官仇諍地計一畝八分北接東長四十六弓止仇信地界西長四十七弓止仇信地界南口九弓止學田界北口九弓止溝中學田界南接東長九弓止仇信界西長十二弓止仇信界南口十二弓止城

下路北口十三弓止學田并仇信地共該田十二畝六分有奇嘉靖二十九年知縣童蒙古教諭謝紹祖置甚屬詳明

雍正十年知縣彭履仁教諭丁宏遠訓導慶勳率紳士重修大成殿尊經閣崇學育才二坊四圍宮牆

學院張廷璐記畧學校王政之本也人才於是乎出風俗於是乎成故致治之盛衰視夫學之興廢今文運昌明天下莫不有學復發

內府金錢數十萬繕治曲阜之文廟其所以尊崇之者至矣朝廷旣備典禮而省會郡邑寧不益感奮激勸以襄茲盛治哉已酉冬余奉

簡命視學江蘇按臨崇川道經臯邑臯固安定胡先生龍圖王
學士之鄉也一樹正氣於神宗之朝一崇雅樂於景祐
之世風節卓卓可師他如何柏齋之諫孫淮海之學許
忠愍之忠賢達之盛後先輝映逮乎我

朝炳炳琅琅翰苑闕臯方興未艾謂非臯學淑氣之所鍾毓
與顧百餘年來風摧雨蝕學宮之朽蠹傾圮殆不可言
臯令彭君履仁廣文丁君宏遠慶君颯慨然以重修爲
己任師儒一倡多士響應鳩工庀材寒暑無輟兩閱歲
落成余時試事告竣過臯城周覽學宮見門序正位講
藝之堂藏書之閣以及棲士之齋櫝器之所宮牆內外
無不巖巖翼翼壯偉宏麗謂非一邑之鉅典而數百年

來之盛舉乎夫教育有地則人才益盛人才益盛則習
俗大醇由一邑而一郡由一郡而天下教化行而風俗
古邽隆之治不於是觀成哉是役也縣宰首倡捐俸廣
文襄事維勤而邑之紳士踴躍捐修若朱學溱若沙潛
龍若范選若徐建中若宗芳三若石立所輸俱不下百
餘金徐建杓更倍之以完厥工總其事者則沙潛龍朱
學演石立之力居多云

乾隆十三年五月初四日烈風傾倒學宮各房屋知縣鄭
見龍教諭王之進訓導姚蘭具文申詳

十四年八月奉藩司飭縣勸捐
十五年知縣鄭見龍教諭任之鏞訓導周旋率紳士重修

教諭任之鏞修學啟如臯安定先生故里也都人士循循雅飭卓犖不羣知經義治事之教流風餘韻猶有存者已巳秋余司鐸於此仰前賢之踵武輒欲一謹庠序顧周視大成殿暨兩廡及明倫堂尊經閣雖規模具在而棟薨剝落楹桷蠹蝕勢將不支未嘗不惶然滋懼蓋臯學自明嘉靖庚子遷建於茲百三十年洎我

朝

康熙辛亥邑人蘇世威實重新之越今又八十年矣不及此早爲之計徒日事補苴甚非所以肅大典而光文治也會上憲加意學校修治之檄巽命重申邑侯淳安鄭公蒞任三載政簡刑清百廢具舉慨然引爲己任而屬余共勩乃事余思平人構一室必預度庀材若干聚糧

若干計工若干儲蓄歲月用觀厥成此何如事寧僅一手一足之力耶既而思際此

重熙

累洽人文蔚起之時觀萬仞宮牆之岌業反不如梵宇蓮臺之金碧輝煌人誰無心况臯夙多好義如崇聖一殿吳君來儀不惜千餘金獨力創建至今實嘉賴之今日之議修雖工鉅費繁然衆擎易舉直發蒙振落耳如諸君不吝解囊芳名永垂不朽於以答邑侯倡始之盛心以不辜各憲培植之雅意是所望於同志者檇樸之詩曰溟彼涇舟烝徒楫之靈臺之詩曰經之營之庶民攻之不日成之蓋言戮力同心之可以共濟而踴躍趨事之易於觀成也余本株儒不揣樗櫟艷慕美舉恭疏短

引幸不河漢余言

十八年邑紳分認修理

大成殿併月臺石欄杆係沈全道黃紹祖黃衍劉光遠
倪天恒朱永聰崔聿修韓永卿張志爵張士餘等公修
用銀九百八十八兩三錢

東西兩廡兩掖門係石立朱濂朱之瀚趙鷄年仲萬邦
王大溥劉漢詔公修用銀四百五十五兩二錢五分

戟門鄉賢祠名宦祠係張大安馬兆祥汪元福劉正興
公修用銀三百二十五兩五錢

尊經閣係范選獨修用銀八百六十四兩六錢五分
明倫堂係汪之珩獨修用銀三百五十四兩七錢

魁星樓係徐建杓獨修用銀五十三兩七錢八分

櫺星門大門係仲之珍獨修用銀七十五兩四錢六分

敬一亭係叢灝石孚同修用銀五十二兩

東牌坊係朱廷歲等認修用銀六十一兩二錢

西牌坊並泮池北邊石欄杆二十丈係洪世揆洪世揆
同修用銀一百一十五兩六錢八分

泮池東西兩大石圈橋係吳執衡獨修用銀六百三十
兩

泮池南新建石欄杆二十丈係張書也獨修用銀一百
二十兩

萬仞宮牆係石景羲重建

知縣陳琨碑記余嘗閱宋史見高宗紹興十四年謁孔子廟止輦殿門外御敦化堂此後世明倫堂前號也又是年胡氏安國子宏與業高閣書曰太學明人倫之所蓋本孟氏學則三代共之皆所以明人倫之意至寧宗慶元二年紫陽朱子白鹿洞臨川縣令修孔子廟請書堂額朱子書明倫堂三楷法應之此明倫堂所託始矣元明及

國朝凡郡縣學堂額稱朱子書者皆臨川鈞本漢唐以後尊儒重道之典獨隆於宋一時創書修復莫不有文以傳之如歐蘇曾王諸學記至今可考信乎學爲一邑士大夫矜式之地可使廟貌不常新哉然余往往過大都邑

瞻仰聖宮至有頽敗零落無以避風雨者則又云何蓋舍宇廣則資費巨歷年久則振興難餼廩土木之用煩則捐銀於一姓非必瘠上不材人士之倦於修善也江南如臯縣爲通州屬邑居淮南而濱海西甘六風土民物文章莫不都雅往代迄今邑乘具載乾隆癸酉春予奉命出宰都邑走謁夫子廟堂則傾圮亦且久矣他日廣文先生任君之鋪錢君燦來告以興復之計且曰前令鄭公曾議修之工甫集鄭公以疾去今不可不有以速繼成其美第計修舉之費惟大成殿明倫堂尊經閣四資用甚大恐遷延歲月而茲舉將復不終也予始亦怒然憂之未幾而殿閣各有所成獨茲堂最後而邑人汪君任之揆

日鳩工不俟終日工將起汪君復來請曰堊裂前後殿閣皆用筒瓦獨茲堂瓦異何於大聖人之宮而前後殊觀耶請用筒瓦與殿閣等又於堂之前礮石爲臺縱橫開廣計二丈許而堂之基地益尊大可觀世則前志所無而汪君初始者也夫施不必博而貴於當財不難於用而貴於誠嘗見當時士大夫家僧樓道院不惜金寶錢穀什百萬計以爲供養而於一切有關風化教養之重反視之漠然不爲料理者何可勝數汪君尊聖人之居感明倫之大毅然行之有補於尊儒重道之術者何限于覽邑志知君先世積有潛德尊大父梁若先生尊公千頃君嘗爲漏澤園納米穀以惠無告雍正甲辰海

潮大嘯古豐場溺死者無算先生樸瘞暴尸至二千五百餘公協營書院平糶賑饑凡邑有大舉每以不肯爭先攘臂爲耻嗚呼此以見君之好善輕財其來有自閏五月工竣乃爲記勒石於堂之西偏汪君名之珩字楚白號璞莊議敘鹽政提舉倜儻非常詩古文尤博雅云三十六年邑紳史鳴臯范曾輝朱昂徐觀政等公請捐修大成殿經義齋治事齋敬一亭忠孝祠土地祠遺愛祠週圍磚牆東西廡至名宦祠鄉賢祠戟門係沈爲隣等認修櫺星門下馬牌係仲元鼇等認修明倫堂係汪爲霖認修尊經閣係范選認修崇聖殿係吳執衡認修魁星樓係徐觀政認修東牌坊係朱之瀚等認修西牌坊係石鉉石銳

石鎬石鉅等認修萬仞宮牆係石鐫石鉉等認修泮池石欄杆係張殿武認修

邑人史鳴臯記是役也經始於癸巳之春三月以迄於仲冬又續作於甲午之春三月以迄于季秋閱十有四月而告厥成焉其程工也認修者曰明倫堂曰魁星閣曰啟聖名宦鄉賢諸祠曰西廡東齋東西坊曰萬仞宮牆曰戟門大門櫺星門曰泮池石欄皆各或費千金或數百十金捐貲自修以圖永固其公捐也重葢者曰大成殿曰尊經閣徹新者曰東廡曰西齋改建者曰

御碑亭重築者曰雲路圍墻新增者曰正殿階墀曰尊經閣鋪地曰學前石路其用公貲也計用銀一千七百十八兩

錢一千三百二十七貫是役也認修者不惜已貲而務力肩公事董修者不糜公費而如圖厥家事是以材無因就厥惟良工罔冒浮厥惟實既整且飾亦鞏以固翼翼嚴嚴可以永年矣既落成列敘認修公捐工某處及數如干另鐫之石余既用勸於作始矣茲樂記其觀厥成也迺率諸生而告之曰而亦知夫學校之所以興乎譬諸甲第閑闕則衣冠集焉子弟之克家者既肯堂復肯構既勤垣墉復塗丹雘果何修而云爾乎夫積行以培其基立志以植其幹瞻之乎禮樂詩書以飭其材澤之乎文采詞章以致其飾于是乎人才蔚起而煥然爲學校光舍力學無由也諸生勉乎哉又是役也勸捐董

事者八人而庀材鳩工朝夕省視則石氏袁氏更懋厥勤焉

三十八年知縣崔正音教諭趙俊訓導陶國果率紳士重修敬一亭爲

御碑亭

三十九年黃衍修葺學宮頭門八字牆

五十八年知縣曹龍樹教諭秦鼎雲訓導宋長溶率紳士范維鍾朱大剛吳鼎祚陳秉仁沈爲樑袁守泰朱洪達等勸修大成殿大成門及兩廡

六十年修戟門名宦祠鄉賢祠及泮池石岸
嘉慶六年吳積忠等重修崇聖殿

八年訓導宋長溶添築得樹齋三楹

九年張殿武同姪振鼈等重修泮池石欄杆

十年石萬泰萬溥萬淦等重修西牌坊

十三年吳功祐等重修崇聖殿

十五年知縣事左元鎮教諭汪元琚訓導宋長溶率董事勸捐尊經閣江西督糧道張溶捐銀五百兩徐宗永湯述會捐錢俱數十千郭純臣捐錢三百二十千諸紳士捐輸姓名銀數悉載題名匾額十七年知通州直隸州事唐仲冕撰文知縣事趙庭椿教諭汪元琚訓導姚澍勒石

十七年監生葛志魯偕弟志許獨力重修銅錫祭器教諭汪元琚訓導姚澍註冊移縣知縣事趙庭椿給匾褒嘉申

詳勒石十九年學政王以銜給守典承先四字匾額以獎勵之

署知縣事孟肇紀記略禮器與樂器相爲表裏者也周禮司尊彝司几筵之屬實居大司樂之先

至聖先師備四代禮樂朱子嘗謂舊禮器圖式不如政和間考遺法鑄造制度精密氣象淳古則禮器之重可知矣如皐爲胡安定先生之鄉安定律呂議於黃鐘之管度量權衡辨察綦詳而禮器顧未之及豈以樂器之制難密而禮器之制易明歟按皐學建於南唐保大十年歷宋元以來閱四百餘年而禮器未備明天順間邑紳葛君錫任蜀長壽縣尹始慨然捐貲製造

國朝乾隆二十四年其後裔名立名韜者因舊制增修嘉慶八年葛氏兆麟等具呈願修旣而未果迨嘉慶十四年前制府大學士松公檄修各學祭樂器葛君錫嫡裔名志魯志許昆季樂施好義承學博汪君姚君勸捐請獨力重修特聘維揚工人將學存簠簋尊罍籩豆百餘事一一增修罔弗完備余適承乏攝皐篆喜見禮器之成將與安定樂器之制並傳也皐之人士其彬彬然興於禮樂未艾乎爰爲之記

二十一年六月邑紳徐宗永獨力捐貲購石版鋪大成殿前月臺及中甬道左右兩丹墀東西兩甬道九月告成知縣事沈濤教諭汪元珺訓導鄭樵勒石

學政王以銜記略夫事之翔始者衆人之所屬目也雖歲遠時遷後之人猶將考其姓字而稱道之余恭膺

簡命典試江南按臨通屬道出如皋攷邑乘臯庠建自南唐至

明嘉靖十九年移建縣治之東南隅規模濶大視舊制不侔矣大成殿前爲月臺爲甬道爲左右丹墀舊係甃鋪第甃質易損不能持久嘉靖迄今二百四十年間不知幾經修葺矣如邑爲胡安定先生故里邑之士夫尊儒尚義至今弗衰豐利場徐君篤信君子也與學博汪君元琚爲媼戚每相過從瞻殿前地甃多殘缺惕然不安請於邑令陳君玉成願捐貲易之以石期在歷久不敝陳君亟稱美之爰鳩工庀材不遠千里購石於宜興



之張渚山計用巨石版一千餘片於嘉慶二十一年又六月開工學博汪君爲之勸董其事三閱月而告成是役也可謂勤矣從此多士之趨躋

聖廟者履殿前坦蕩之磐石詎不爲升堂入室之基也哉徐

君之祖名德健父名承浩本生父名旭罔弗爲德於鄉君名宗永字詠堂山西鹽課大使以子貴誥封朝議大夫其子朗官浙江運副誠慤有父風工詩余採諸輿論知徐君居恒樂於爲善歲饑則捐金以資賑濟時旱則掘井以暢泉源施緜衣以禦冬寒割腴田以爲義地其於周急弥患恤孤矜寡之事殆難縷數今此舉尤爲獨任其大壯觀瞻而期攸久固無意於求名而名不朽矣

工竣勒石學博汪君請叙於余余嘉徐君之志而樂觀厥成也故濡墨而書其事

二十二年監生張超率子步衢重修忠孝祠



學宮圖說

中為大成殿東西為兩廡前為戟門又前為櫺星門東廡北為宰牲所又北為東掖門西廡北為神厨又北為西掖門後為明倫堂東為居仁齋西為由義齋堂後為尊經閣閣後為崇聖殿閣西為遺愛祠祠後為土地祠戟門東為名宦祠西為鄉賢祠北為教諭署又北為訓導署櫺星門東為儒學門又東為奎光樓北為敬一亭即又北為忠孝祠門東西為興賢毓秀二坊外為泮池東為文定橋西為武定橋南北石欄南為屏牆牆三門牆外為射圃為木碑一為石碑凡二十五址縱七十九丈橫二十三丈四圍宮牆凡一百九十四丈六尺

崇祀 從祀附

宋真宗祥符二年始封聖考為齊國公

元文宗至順元年加封啟聖王

明世宗嘉靖九年改封啟聖公

十年別建啟聖祠春秋祭祀以顏無繇曾點孔鯉孟孫激左右配享俱稱先賢以程珦朱松蔡元定兩廡從祀俱稱先儒

二十二年以先儒周輔成從祀

國朝雍正元年改啟聖祠為崇聖祠追封孔子以上肇聖王木金父公裕聖王祈父公詒聖王防叔公昌聖王伯夏公啟聖王叔梁公並為王爵

二年以先儒張廸從祀定神主位次

崇聖祠

肇聖王木金父公正中南向

裕聖王祈父公東一室南向

詒聖王防叔公西一室南向

昌聖王伯夏公東二室南向

啟聖王叔梁公西二室南向

配位先賢顏氏無繇孔氏鯉東配西向先賢曾氏點孟孫

氏激西配東向

東廡先儒周輔成程珦蔡元定

西廡先儒張廸朱松

儀注歲春秋仲月上丁同日致祭行兩跪六叩首禮餘與大成殿同

祭品正位前各帛一羊一豕一釧二簠簋各二籩豆各八爵三尊一鑪一鐙二四配位各帛一簠簋各一籩豆各四爵三東西各羊一豕一尊一鑪一鐙二兩廡從位東二案西一案均簠簋各一籩豆各四每位爵一東西各帛一羊一豕一尊一鑪一鐙二俎篚冪勺具

漢明帝東巡至魯祀孔子及七十二弟子

曹魏文帝祀孔子以顏回配

晉宋梁陳隋皆以孔子為先聖顏回為先師

唐太宗復以顏回配左邱明以下二十二入並令配享

高宗始以曾參與顏回並配

元宗為塑像詔顏回曾參像宜坐

宋神宗始以孟子配食文廟又增荀況楊雄韓愈三人從

祀

理宗淳祐元年詔周敦頤張載程顥程頤封爵與朱熹並

從祀孔子廟廷

景定二年加張栻呂祖謙二人並從祀

咸淳三年以顏回曾參孔伋孟軻並配孔廟四配遂定又

升顥孫師於十哲列邵雍司馬光從祀

元仁宗以許衡從祀

文宗加封顏回為兗國復聖公會參邾國宗聖公孔伋沂

國述聖公孟軻邾國亞聖公是年冬追祀董仲舒

明正統二年以胡安國蔡沈真德秀吳澄從祀

宏治八年以楊時從祀

嘉靖九年考正祀典定四配為復聖顏子宗聖曾子述聖

子思子亞聖孟子十哲閔損冉耕冉雍宰予端木賜冉求

仲由言偃卜商顥孫師東西兩廡祀澹臺滅明以下六十

二人稱先賢左邱明以下二十二人稱先儒去從祀者一

人申棖又罷公伯寮秦冉顏何荀況戴聖劉向賈逵馬融

何休王肅王弼杜預吳澄十三人增祀后蒼王通歐陽修

胡瑗陸九淵五人而以蘧瑗林放鄭衆盧植鄭康成伏虔

范甯七人各祀於其鄉

隆慶五年以薛瑄從祀

萬歷間以羅從彥李侗王守仁胡居仁陳獻章從祀

國朝康熙五十一年升先儒朱子熹為先賢列於哲位

五十四年以范仲淹從祀

雍正二年復祀蘧瑗林放秦冉顏何鄭康成范甯六人增

祀縣直牧皮樂正克公都子萬章公孫丑諸葛亮尹焞魏

了翁黃幹陳淳何基王柏趙復金履祥許謙陳澔羅欽順

祭清陸隴其共二十八

乾隆二年復吳澄從祀

三年升有子若於哲位始稱十二哲

至聖先師孔子木主位大成殿正中南向復聖顏子述聖子思

子東配西向宗聖曾子亞聖孟子西配東向

東哲先賢閔子損冉子雍端木子賜仲子由卜子商有子

若

西哲先賢冉子耕宰子予冉子求言子偃顓孫子師朱子

熹

東廡先賢蘧瑗澹臺滅明原憲南宮适商瞿漆雕開司馬

耕梁鱣冉孺伯虔冉季漆雕徒父漆雕哆公西赤仕不齊

公良儒公肩定鄒單罕父黑榮旂左人郭鄭國原亢廉潔

叔仲會公西輿如邾吳陳亢琴張步叔乘秦非顏噲顏何

縣直樂正克萬章周敦頤程顥邵雍

東廡先儒公羊高伏勝董仲舒后蒼杜子春諸葛亮王通

范仲淹歐陽修楊時羅從彥李侗呂祖謙蔡沈陳淳魏了翁王柏趙復許謙吳澄胡居仁王守仁羅欽順

西廡先賢林放宓不齊公冶長公皙哀高柴樊須商澤巫馬施顏辛曹卹公孫龍秦商顏高壤駟赤石作蜀公夏首

后處奚容蒧顏祖句井疆秦祖縣成公祖句茲燕伋樂欬狄黑孔忠公西咸顏之僕施之常申棖左邱明秦冉牧皮

公都子公孫丑張載程頤

西廡先儒穀梁赤高堂生孔安國毛萇鄭康成范甯韓愈胡瑗司馬光尹焯胡安國張栻陸九淵黃幹真德秀何基陳澔金履祥許衡薛瑄陳獻章蔡清陸隴其

乾隆七年禮部議准先師先賢先儒木主位次

先師位高二尺三寸七分濶四寸厚七分座高四寸濶七寸厚

三寸朱地金書東西配位高一尺五寸濶三寸二分厚五分座高四寸濶六寸厚二寸八分東西哲位高一尺四寸

濶二寸六分厚五分座高二寸六分濶四寸厚二寸東西廡位先賢木主式皆與東西哲同先儒木主高一尺三寸

四分濶二寸三分厚四分座高二寸三分濶四寸厚二寸

康熙十四年

欽頒萬世師表額懸大成殿

雍正三年

欽頒生民未有額懸大成殿

乾隆五年

欽頒與天地參額懸大成殿

嘉慶六年

欽頒聖集大成額懸大成殿

名宦鄉賢祠在大成殿之西南嘉靖十六年泰州同知署如臯縣陳大壯創為之今移祠名宦於大成門之東祠三楹祠鄉賢於大成門之西祠三楹上丁日祭

名宦位次宋縣令曾易占胡令儀明知縣仇吳胡昂徐相黎堯勳

國朝總督傅臘塔學院張泰交總督于成龍鹽法道周亮工

巡撫張伯行學院余正健大學士蔣廷錫總督李衛

鄉賢位次宋天章閣侍講胡瑗龍圖閣學士王觀孝子丁

天錫元延祐三年解元平江路總管陳應雷明右都御史

寧夏巡撫冒政監察御史馬繼祖福建布政使左叅議冒

鸞海豐知縣劉瑗太子少保南右都御史謚文定何塘太

子少保南工部尚書謚文恭孫應鼈廣西布政使蘇愚雲

南寧州知州冒夢齡新泰縣知縣李上林光祿寺署丞李

伯龍

國朝贈中書舍人范永贈中憲大夫范育

戶部侍郎葉相記臯舊無名宦鄉賢祠同知泰州事陳

公來視邑篆瞿然興曰是長民者之責也乃考求乘籍

參訂耆宿名宦得先事知縣曾公易占胡公令儀及胡

公昂數賢鄉賢得安定胡公瑗龍圖學士王公觀孝子

丁公天錫及知海豐劉公瑗監察御史馬公繼祖參議
冒公鸞數賢乃周爰相度得地之良於丁孝子祠之故
址遂取材於廢宇而用不廢帑貿工於贖入而民不告
勞匝月而祠成爰神有楹繚楹有垣門屏牲軟器皿咸
備邑吏民在公在野無小大成忻忻懷思興起謂當有
述也乃問於相相曰賢乎邦大夫之務德以化民也不
亦遠乎蓋標準立則民自趨風聲樹則民自感勸戒昭
則民自化舉措不外人情而感應捷於桴鼓賢乎邦大
夫之務德以化民也不亦遠乎按祭法曰功在於民者
祀之仰惟諸賢德愛若曾嚴正若胡嘉猷善政澤被於
皐皐之民至今懷其惠也不衰茲非功在於民者乎又

曰法施於民者祀之若胡之理學王之忠鯁丁之孝誠
及篤行如劉風節如馬純正如冒大足以師表百世小
可以範淑鄉閭皐之人得所依歸茲非法施於民者乎
孔子曰見賢思齊焉又曰三人行必有我師焉吾黨之
士仰先哲之高蹤漱餘芳以自淑有不欲思齊者乎三
人行尚足以得師矧諸賢儀型森布式序吾人誦讀其
詩書尚論其世曰某宦績若何吾思其所以爲官某鄉
行若何吾思其所以爲人師不在茲乎詩曰高山仰止
景行行止願與吾黨之士相共勉之陳公名大壯嘉靖
己丑進士爲特書麗石以告我後人云
邑人嚴怡述安定祠自昔有之專祀安定先生王公祠

者宋龍圖閣學士王公覲之先塋也舊侵於僧嶺南梁公始力復之因於垣外作祠題學士主祠焉丁孝子祠者梁令泚掃東嶽廟而爲之者也比有詔建啟聖廟有司過計其值而自入焉乃撤孝子祠爲之因耐其位於王祠而孝子祠廢爲隙地矣今年仲秋上丁大祀之明日洛陽裕菴陳公祀王公祠見孝子位耐食學士壇次則感然曰孝子有靈其不依人之墓而食學士有靈其不忍其祖若考之不食是其於鬼神爲責於人理爲非情也則又曰鄉先生如安定其人宜有專祠名宦鄉賢宜遵詔令祠祭公於是卽孝子祠地以經營撤僧屋之在野者贖入之在官者屬冠帶義民張慥協工曹司吏

秦許董治之再旬而事竣乃卜是月二十四日奉主入祠自爲文告祭之其以名宦祀者自曾公易占以下若而人以鄉賢祀者仍以安定先生爲主次龍圖學士以下若而人皆名實無媿山明者也其於安定祠則以先生之伯子志康仲子志山配焉於王祠則學士之王大父載伯考惟清考惟熙山弟觀從孫俊又父祖子孫皆得同堂而合食焉是公以山神人之理可謂察之彰明處之詳盡百年曠典一朝山之也可以風勵夫生茲土者焉可以風勵夫官茲土者焉

忠義孝悌祠在儒學門內雍正九年建祀明贈鎮國將軍都指揮使朱顯忠吏部員外郎謚忠愍許直孝子鴻臚寺

序班許文炳義民盧禎

國朝孝子貢生徐宏成生員石 示陝西副將贈總兵官冒重

光孝子朱龍雲

遺愛祠在尊經閣西

土地祠在遺愛祠後

禮儀

省牲之禮前期一日晡時承祭官分獻官各具補服詣省牲所巡一匝北向立以西為上待禮牲者折身曰充贊者曰告充畢禮牲者又折身曰膋贊者曰告膋畢并瘞毛血贊者復引承祭官分獻官詣神廚視滌漑畢退釋奠之儀正祭日分獻陪祭各官入兩旁門序立贊引

一人對引一人導承祭官至盥洗處盥手畢引至臺階

下立唱樂舞生就位執事者各事其事分獻官陪祀官

各就位文舞生執羽籥引進贊引贊就位承祭官就拜位立分獻

官隨後立唱迎神唱舉迎神樂奏昭平之章樂作贊引

贊跪叩興承祭官陪祭官分獻官俱行三跪九叩頭禮

興樂止唱奠帛行初獻禮唱舉初獻樂奏宣平之章樂

作贊引贊陞壇導承祭官由東階上進殿左門贊引贊

詣

至聖先師孔子位前承祭官至案前立贊引贊跪叩興承祭

官行一跪一叩頭禮興贊引贊奠帛奠帛者捧帛跪進

承祭官受帛拱舉立獻畢贊引贊奠爵執爵者捧爵跪

進承祭官受爵拱舉立獻畢行一跪一叩頭禮與不贊贊詣讀祝位承祭官詣讀祝位立讀祝者至祝案前一跪三叩頭捧祝板立於案左樂止贊引贊跪承祭官分獻官讀祝陪祭各官俱跪贊引贊讀祝讀祝者讀畢捧祝板至正位案前立跪安帛匣三叩頭退樂作贊引贊叩與承祭官及各官行三叩頭禮與贊引贊詣

復聖顏子位前承祭官就案前立贊引贊跪叩與承祭官一跪一叩頭與贊引贊奠帛捧帛者跪進於案左承祭官受帛拱舉立獻案上贊引贊獻爵執爵者跪進於案左承祭官受爵拱舉立獻案上行一跪一叩頭禮與不贊贊詣

宗聖曾子次

述聖子思子次

亞聖孟子各位前獻帛獻爵如前儀其十二哲分獻官陞壇奠帛獻爵如承祭官禮兩廡分獻官如承祭官禮畢贊引贊復位承祭官分獻官各復位立樂止唱行亞獻禮唱舉亞獻樂奏秩平之章樂作贊引贊陞壇獻爵於左如初獻儀贊引贊復位承祭官分獻官各復位立樂止唱行終獻禮唱舉終獻樂奏敘平之章樂作贊引贊陞壇獻爵於右如亞獻禮贊引贊復位承祭官至殿內立捧酒胙二人捧酒胙至正位案前拱舉至飲福胙位右旁跪接福胙二人在左旁跪贊引贊跪承祭官跪贊

飲福酒承祭官受爵拱舉授接爵者贊受胙承祭官受
胙拱舉授接胙者贊引贊叩與承祭官三叩頭與贊復
位承祭官復位立次行謝福胙禮贊引贊跪叩與承祭
官分獻官及陪祀各官俱行三跪九叩頭禮與唱徹饌
唱舉徹饌樂奏懿平之章樂作徹訖樂止唱送神唱舉
送神樂奏德平之章樂作贊引贊跪叩與承祭官分獻
官及陪祭各官皆行三跪九叩頭禮與樂止唱捧祝帛
饌各恭詣燎位捧祝者捧帛者至各位前一跪三叩頭
捧起祝文在前帛次之捧饌者跪不捧起在後俱送至
燎位承祭官退至西旁立候祝帛饌過仍復位立唱望
塵唱舉望塵樂樂作贊引贊詣望塵位導承祭官至痊

位立祝帛焚斗贊禮者贊禮畢退

祭品正殿陳設帛一爵三牛一羊一豕一登一大羹鉶

二和羹簋二黍稷簋二稻粱籩十棗栗芡菱榛形鹽藁

魚鹿脯白餅黑餅豆十菁菹芹菹笋菹韭菹醢醢鹿醢

兔醢魚醢脾析豚胛罇一有勺

四配位陳設每位帛一爵三羊一豕一鉶一和羹簋二

黍稷簋二稻粱籩八榛芡菱棗栗鹿脯形鹽鱔魚豆八

韭菹菁菹芹菹笋菹醢醢鹿醢兔醢魚醢罇一

十二哲東西位陳設每位帛一爵各一羊一豕一鉶各

一和羹簋各一黍簋各一稷籩各四棗栗鹿脯形鹽豆

各四菁菹芹菹鹿醢兔醢罇一

兩廡東西十二龕陳設每位帛各一爵各一每四龕羊一豕一簋一黍簋一稷籩四棗栗形鹽鹿脯豆四菁菹芹菹鹿醢兔醢罇一

祭器祝版爵登銅簋簋籩豆罇篚罇桌牲匣帛匣木盤香案香爐燭臺供桌毛血盆酒杓滌桶羹椀

乾隆二年復增犧罇象罇山罇壺罇著罇罍罇太罇銅龍勺繡龍羃俎盤連桌

按爵登銅簋籩雍正二年頒行圖式皆沿舊制以瓷器乾隆二年更正惟爵用瓷登銅簋籩用錫酒罇仍用銅增犧罇等七罇用精鐵

乾隆二十四年邑人葛立葛韜因其遠祖官四川長壽知

縣葛錫於明天順時曾捐置銅爵等貯臯庠又復捐鐵瓶二鐵燭臺四銅鼎一銅瓶二銅爵百三十五銅酒罇一銅簋二銅籩二銅豆八銅籩八銅焚帛盆一銅爵二十銅盥盆一錫大方燭臺二錫方花瓶十二錫方香爐六錫酒罇四錫中方燭臺十二錫大圓燭臺十二錫小圓燭臺十一錫小圓香爐八錫中圓香爐八錫大獻盤一錫中獻盤四錫花酒壺一錫沙池一錫提爐二錫毛血盆七木籩豆二百六十木帛匣九木牲匣十八大犧牲槃一石香爐二木供盤三十黃紅布桌圍十八祝版二木香案桌一黃緞桌圍一祭器木櫃二鐵庭燎四器用咸備知縣何廷模請煇之

知縣何廷模記如皋縣儒學文廟有祭器舊矣歲久缺壞僅有存者每春秋祀事輒多方移用器具弗供禮可知也攷縣志自前朝天順間邑紳葛君錫宦成後曾捐貲備諸器如制今舊器之存者欸識尙存可辨嗣後無過問者年代浸遠刊敝幾盡丙子秋余來視事明年胡君嗣齡秉鐸茲土暇日爲余言相顧咨嗟以簿校紛甚未遑籌此歲己卯勸邑中士紳捐置樂器將以次爲茲事畫而葛君之十世孫立與其弟韜願獨力辦余聞而嘉之具狀申上憲請給匾額予之旌並賜諸生冠服如奉祠樂舞生例今所重置者已一一如舊制啟聖祠及堂庶應用器莫不成備爵豆俎尊之屬煥然一新可謂

盛矣獨計葛生雖爲宦裔而家資未及中人乃能慨然以此自任加人一等葛君之爲善有後葛生之克紹前徽均可傳諸不朽余故樂爲記之且勒石俾邑人士世世知有葛君祖孫交相勸云

嘉慶八年葛氏裔孫兆麟兆桂兆蘭等復具呈重修

樂器乾隆十五年鄭志載存麾節編鐘編磬鑪鼓琴瑟簫管笛排簫塤箎祝敵籥翟干戚傘

二十四年邑紳士捐置大成鐘一大成鼓一鳳鼓一鼗鼓二搏拊鼓二琴四瑟二排笙二排簫二紫簫四龍笛四鳳笙四塤二箎二金鐘四玉磬四編鐘八編磬八祝一敵一麾幡二龍節二黃緞曲柄九龍傘一羽翟四十二籥筒四

十二樂器木櫃一今歷年已久不無缺失損壞

知縣何廷模記周禮樂師掌皇舞敝舞其旌人教舞散樂夷樂樂之有舞古也有其器無其人不能為古樂焉有其人無其器亦不能為古樂焉廷模承乏臯邑祀

先師於上丁間所謂樂舞者鬱湮已久心缺然憂之丁丑歲學憲晉寧李公檄取舞生八十八名賜冠帶籥翟俾習儀每試異冊申牒列諸童子生前寵異之模與鄉大夫鄉先生議勸置諸肆春牘絃匏笙簧各如制遴諸生之敏者受教於知樂之師月餘咸精其能今歲仲春之祭堂上堂下升歌間歌肅雝和鳴舞人剌剌起武善為禮容綴兆罔愆觀者異音同歎喜模有志之竟成也慮無

其繼雖美弗傳乃錄諸器名目牘記之交司鐸省視藏於其署之左右今并錄諸好義姓名勒諸石碑後來為政者有所考以時補其缺而教其譜器壞則修藝精更習庶不負

國家尊師之意與二三君子扶持學校之苦心模雖他去回首宮牆其亦可區區稍慰也乎

碑載捐貲紳士十二人董事五人

樂章迎神奏昭平之章奠帛初獻奏宣平之章亞獻奏秩平之章終獻奏敘平之章徹饌奏懿平之章送神奏德平之章

祝文乾隆九年

欽頒正殿祝文惟

先師德隆千聖道冠百王揭日月以常行自生民所未有屬
 文教昌明之會正樂和禮節之時辟雍鐘鼓咸恪薦以
 馨香泮水膠庠益致嚴於籩豆茲當仲春秋祇率彝章肅
 展微忱聿將祀典以復聖顏子宗聖曾子述聖子思子
 亞聖孟子配尚饗

崇聖祠祝文惟

王奕葉鍾祥光開聖緒盛德之後積久彌昌凡聲教所覃敷
 悉循源而溯本宜肅明禋之典用申守土之誠茲屆仲
 春聿修祀事以先賢顏氏先賢曾氏先賢孔氏先賢孟
 氏配尚饗

忠義孝弟祠祝文維靈稟賦貞純躬行篤實忠誠奮發

貫金石而不渝義問昭宣表鄉閭而共式祇事懋發倫
 之大性摯莪蒿克恭念天顯之親情殷棣萼模範咸推
 夫懿德

綸恩特闡其幽光祠宇維隆歲時式祀用陳尊簋來格几筵尚

饗

節烈祠祝文維靈純心皎潔令德柔嘉矢志完貞全閨
 中之亮節竭誠致敬彰閩內之芳型茹冰蘖而彌堅清
 操自勵奉盤匱而匪懈篤孝傳徽

絲綸特沛乎殊恩祠宇昭垂於令典祇循歲祝式薦尊醪尚饗

學額

歲貢年分明洪武十七年後歲貢三十年後無貢永樂元

年後連歲貢惟十年二十年闕正統三年後間歲貢廩生四十歲者皆入貢景泰元年至五年連歲貢天順二年後間歲貢六年令四十五歲以上皆入貢是年一歲貢十人而六年後又連歲貢成化二年後間歲貢宏治元年後間歲貢十一年後連歲貢正德元年後間歲貢十五年貢二人嘉靖元年二年連歲貢三年後間歲貢十一年十二年後連歲貢二十三年後連貢間貢不等隆慶萬歷泰昌天啟皆間歲貢崇禎連歲貢

國朝二年一貢儒學上其名於學政考試給貢單貢入太學廩增額數廩膳生員二十名增廣生員二十名不知何時悞缺增生一名

國朝乾隆十六年教諭任之鏞詳請仍復原額

生員科舉額數明萬歷己酉以前科舉十九人錄遺無定數天啟元年知縣李衷純力請於學使者得增三人儒士科舉一人錄遺一人

國朝初科舉三十人或三十五人或四十人康熙年間科額漸廣解無定數或百人或八九十人遺錄復倍之乾隆九年頒定科場條例額稍減焉

童生入學額數明入學額數增減無定天啟二年知縣李衷純請增入二人

國朝順治元年後十六人十年後十五人康熙十五年後減三人止十二人十六年入學三人有貲助兵餉者得充生

員無成數十九年仍復十二人後又增五人雍正元年
恩廣五名舉行一次四年增額五名連前增定額二十二名乾隆

元年二年額外廣五名十七年二十二年二十八年三十
一年四十六年四十九年六十年皆額外廣四名嘉慶元
年六年比額外廣五名武童入學定額十三名

書籍五經大全各一部 五經一部 五經旁訓一部

禮記摘註一部 四書大全一部 四書一部 四書摘

註一部 廿一史全部 天祿閣外史一部 通鑑一部

通鑑紀事本末一部 文獻通考一部 廣文選一部

白虎通一部 朱子全書一部 性理二部 崇古文

訣一部 理學文鵠一部 明倫大典一部 楚詞一部

韓文一部 明祖訓大誥律令一部 楊忠愍公文集

一部 王心齋集一部 陳白沙文集一部 文心雕龍

一部 小心齋劄記一部 日新要語一部 四藝考一

部 太上感應篇一部 為善陰騭四部 五倫書一部

孝順事實一部 覆瓿語一部 藝圃球琅一部 維

揚嘉靖志一部 鎮江志一部

按以上係前明貯學書籍盧志載各書遺

國朝乾隆二年頒發

上諭四函計四十四本 十三經註疏十六套計一百二十本

日講四書解義四函計二十四本 性理精義二函計十本

四年頒發

御纂朱子全書各一部六十四本 周易折中各一部二十四本

書經傳說各一部四十八本 詩經傳說各一部四十

八本 春秋傳說各一部四十八本

五年頒發

上諭一本

御批資治通鑑各一部共十六套一百六十本 孝經衍義各一

部六十四本 廿一史全部四百九十八本 明史一部

一百十二本 學政全書一部八本

欽定四書文四函四十四本

按以上係州志所載不確難憑考核

上諭二十四本

聖諭廣訓一本

上諭二本又一本

聖諭廣訓五函二十本

上諭條例九本又二冊未訂

欽定三禮一百二十八本

御批綱目二部十六函

御製詩文 詩初集二
集文全集

樂善堂文集三十六本 又一部 缺一本
原繳還

欽定四書文三部六十六本

南巡盛典四十八本

日講四書解義二部

盛京賦二本 周義折中二部二十四本 詩經傳說三部七十二本 書經傳說二部半缺一兩六十本 春秋傳說三部七十二本 周易述義四本 詩經折中八本 春秋直解六本 大學衍義一部十二本 孝經衍義四部六十四本 十三經註疏無學庸 公羊 性理精義三部十五本 廿一史全部四百九十六本內缺北史一本 明史一部一百一十二本 綱鑑續編二函 朱子全書二部八函 唐宋詩醇二函 日知薈說二函 聚珍板二函二十七本 又聚珍板十八種未訂 學政全書一部又二本 又一部二函 律纂條例一冊 訓飭士子文 官員接見儀注一冊 文廟碑文十冊 吏部則例兼六部二十本

禮部則例全部 平定金川碑文十本 改教詩碑文四函 清漢對音一本 近思錄一部四本 科場條例一本 江蘇冊結式一本在學書處 壇祠祝文儀注一本無今 祭器樂器圖一本無今

按以上係學庫存書若干

大學衍義輯要二本 衍義補輯要六本 四禮翼一本 四禮初稿一本失 司馬公傳家集十二本 正史約十六本 呂子節錄二本 孝經註解一本 小學纂註二本失 近思錄集解二本 在官法戒錄二本 從政遺規二本 紀年便覽一本 養正遺規一本 訓俗遺規二本 教女遺規二本 豫章學約一本

按以上係江蘇巡撫陳宏謀發存臬庠書若干

乾隆五十五年黃興祚捐送書籍計七千一百九十九卷

尚書彭元瑞記

本朝重熙累洽

列聖相傳罔不本經術為陶冶

御旨諸書炳若日星

頒發學宮昭示來哲

今上集羣聖大成壽應期頤猶日孜孜

命儒臣輯四庫全書並

賜二分藏之江浙許令士子就讀美矣善矣巍乎煥乎自有天

地以來未覩斯盛也第窮簷孤士既不獲躡屣擔登聲

石室名山之秘惟咕嗶一經終年學舍徒慨想於所未
及見者正多矣而如臬黃叟適有捐書之舉黃叟名興
祚字紹翼號芝田邑布衣也其先世故多藏書課子若
孫外分其副本捐送儒學

欽定

淵鑿類函以下計書四千七百五十九卷又捐送書院書
二千四百四十卷附焉邑之學博士已請於郡守學使
者垂久遠矣而又乞余文為之記余嘗兩奉

簡命

視學江左知邑多藏書家然皆私為帳中枕秘不輕示人
黃叟獨分惠藝林俾嗜書者寢饋之而又無借緘還緘
之煩良義舉哉夫書猶田也佃者利之無田者不得耕
也今黃叟以其田為公田則人人得而治之而收穫之

井衍沃而黍稌多其為功不亦巨乎且黃叟以其田為公田而邑人士之慕義者踵相望亦且分其田以歸諸公豈非

朝盛事愈有以助

聖

子文治之隆哉余固嘉其志而樂為道之斯更有望於聞

風興起者

嘉慶八年黃理續捐送儒學書籍計三千七百十七卷兩共計一萬九百十六卷因卷目浩繁未經查核現存學冊可稽

邑人戴聯奎記韓子有言莫為之前雖美弗彰莫為之後雖盛弗傳斯美者盛者不盡彰且傳也然有其始之

後必有繼焉如黃氏捐書邑學可徵已邑學尊經閣奉

欽頒典籍外故無藏書之田布衣慨然出鄴架之餘捐送附皮

彭芸楣尚書為文記其事時乾隆庚戌越十三載其子理續承先志又增益之計書共一萬零九百一十六卷經史子集靡不大備視他郡庠所罕有邑人士朝弋而夕漁焉惠之所及豈淺鮮哉宜制府陳公方伯康公皆嘉尚之檄載於志予日侍

禁近去鄉久不獲躬親其盛樂聞之為識數語書諸石於以

歎黃氏父子之先後相媲美也不既傳而益彰乎

學田

明天順八年教諭周鼎置縣北八里莊田八十畝原係民

人張福一地東止路外及張圯地界西止岸外及蘇家地界南止溝中界北往南一灣止溝中界

童志云給饌堂柴薪呂志載曹忠種盧志載租銀二兩

七錢鄭志同

又置縣南二十里官莊田一頃一畝六分六毫原係民人

朱裝地計三段一段坐落蒲湖三十七畝一分一釐八毫

東止溝中李鶴界西止岸中阮家界南止溝中陳祿界北

止溝中陳瑤界一段莊家屋基田五十七畝二釐八毫東

止溝中范愚界西止溝中吳鬻界南止溝中沈言界北止

溝中孫湧界一段李應禎田七畝四分童志缺書此段界止并脫六釐二字

呂志作孫煜種三十二畝五分雍銑種三十二畝五分

阮講讜種二十七畝五分冒高種九畝一分六毫盧志

載租銀共五兩九錢一分鄭志同

嘉靖三十九年知縣童蒙吉捐俸置買縣西七里夏家園

二百三十二畝七釐原係民人章枝地坐落官路北計一

塊東長五百零一弓止溝中外及章謙章詳地界西長四

百七十二弓止溝中外及章謙章詳地界南口一百二十

七弓半止溝中外及官路界北口一百一十一弓止溝中

外西一半止張稼地界東一半止章枝地界

呂志載張勤種盧志止載二頃三十畝租銀七兩五錢

鄭志同

又置縣北二十里柴市灣東北田一頃二十七畝有零原

係為盜滅門人錢寧地計八段住基下一段前後連墳園
 四段東止溝中外及史諍地界西止錢寅南止池中徐
 尊地界北止岸界住基前東橫田路西一大段路東一小
 段東止岸西止溝南止溝北止路住基前西橫田東一大
 段西一小段東止路界西止岸外周連地界南止溝中外
 徐尊界北止路外錢宴界住基東徐家鑒田東止岸外錢
 週界西止岸外錢深界南止溝中外錢宴界北止溝中外
 周淵界住基西北盧家園東止岸外錢寅界西止岸外錢
 寅界南止池中界北止溝中外江銘界一段座落河西稻
 田十六畝東止周洋地界西止周文錢福地界南止周洋
 地界北止周本地界嘉靖四十三年奉學院耿明文帖還

錢寧房弟錢宙等三分均受訖

又置儒學前十二畝六分三釐五毫

童志詳載四止今移射圃呂志云租銀四兩九錢盧志
 云改為射圃鄭志同

又原存學田縣南天生港楊文彩四十一畝九分

呂志租銀一兩二錢五分盧志云因江湖坍沒續遷久

安小圩楊文秀承種租銀二兩鄭志同

又原存學田縣北十三里許家莊西官田五十畝

呂盧鄭志俱載租銀二兩

萬歷十三年增縣南六十里天生港西薛琴田十二畝四
 分一釐零

如皋縣志 卷九
呂盧鄭志俱載租銀六錢

三十八年生員錢體元與范瀏爭告北關外街西瓦房一所送學助建尊經閣公用租銀九兩

三十九年本府趙發到犯人劉鈿紀家莊田二百二十七畝並住房園林樹木

按此項田房隨經署印訓導谷瀾申請賣價助建尊經閣公用在卷該租銀十七兩九錢呂志云二項田變價完工不在學田之數

又增縣東一百里豐利場桑昂田十七畝八分

呂盧志作送鄭志作置俱載租銀一兩二錢

四十年增縣北三十里楊蠻河北陳林田二十一畝零

呂盧鄭志俱載租銀一兩六錢

四十一年增縣北二十里張家莊石成瑜田六十六畝內草蕩四十三畝熟田二十三畝

呂盧鄭志俱載租銀三兩三錢

四十二年增縣東一百一十里馬塘孔家莊管日坤田七十三畝八分

呂盧鄭志俱載租銀三兩三錢

又生員丁確送縣西丁孝子塋外田七畝以供香火

呂志租銀一兩盧志作三兩鄭志同

又縣東白蒲鎮河南官田二十四畝

呂志不載置年租銀八錢盧鄭志同

又湯家灣田一匡楊家河田一匡

按二項呂志云不知何年置入向係兩齋訓導收租查無卷案實數盧鄭志皆云不可考

國朝康熙三年詳允開墾學田一百二十九畝

盧志租銀五兩八錢五釐鄭志同

按以上解藩租田五百八十一畝本學徵收租田二項八十四畝六分零除湯家灣楊家河二項無考外俱查實田註冊

乾隆三年邑紳吳鳳翔子執衡捐田一百畝歲徵租銀二十兩永遠修葺崇聖祠

按此田租不入學遇修理係吳氏承認今此田既未入

學其租亦未入學歲修縣案可稽

四十二年邑紳徐觀光捐送水竹園田一百二十八畝歲徵租銀六十二兩一錢六分備儒學歲修

學政謝墉記

聖天子德化覃敷光天之下至於海隅莫不興學凡立學者莫不繕修宏整巍然煥然以丕昭文治使者奉

命視學江蘇乙未秋歲試三吳後渡江按揚及通於是屬邑如臯修學工竣學博士謁余曰臯學歲久失修茲集邑之士大夫協乃心力亦既克襄厥成惟是無田無以歲歲事是以風雨鳥鼠之不時而侵削是虞有原任刑部員外郎徐觀光既認修奎星閣復請捐水竹園田百二十

八畝於學以其田租所入爲歲修貲蒙上憲予可欲請錫言以記之予惟秉經稽古風示教諭以作興膠序廣樂育而答

盛明

使者之事也習禮課藝躋講堂趨殿廡滌除黜聖相與經理而整葺之博士諸生之職也歲入息數十金而以充實費之用則其保成功也鉅亦在善爲之而已且夫無歲不修歲不一修歲修之義也工固有之學亦宜然記曰蛾子時術之兌命曰敬遜務時敏厥修乃來言君子於學無時暫替所以俾勿壞也苟外飾爲文章斧藻而玩愒不修燕朋燕僻則秉間抵巇者口攻其內而腐蠹剝蝕之其爲風雨鳥鼠不亦多乎此亦宜鑑藝事而

知儆矣學者勗哉若徐君者自出其力而不尸其功殆先實而後名者耶歷歲無疆而慎修思永殆循名而責實者耶兩博士其善爲之俾書而貞諸石

嘉慶二年知縣曹龍樹發到韓百朋韓家洋田十六畝五分祝九龍承種租錢八千文備修學署

按學校志舊有鹽院項下田拼茶場曹盛二頃二十七畝八分九釐八絲租銀四兩五錢四分呂志載本縣徵收貯庫聽用盧志註崇禎元年詳允撥入泰州徵解鄭志未載

十四年邑紳朱洪壽捐送十里墩七里缺三接橋等處秧園田二百一十一畝每歲租錢一百五十九千九百九十

如皋縣志 卷九
二文以備士子鄉試盤費

洪道序吾鄉朱靜原先生係名進士鳳台公裔孫先生
夙承家學體卹寒儒先是臯邑鄉試者二百人近今資
斧艱難額數減半先生慨然曰有能壯其行囊奇材異
敏之士何致沉淪草莽乎先生家非素封蓄志十年丙
寅六月染疾在床語夫人方氏捐田三處計實田二百
一十一畝每年額租錢一百五十九千九百九十二文
爲寒儒鄉試盤費方夫人敬遵夫命捐產入公由縣詳
州道司院定立章程批獎在案勒石明倫堂命子章鶴
監成其事洵臯邑未有之盛舉也恐歷年久遠不免侵
占竊賣諸弊今遵左父臺防微杜漸之美意將田畝住

落租息各憲批示暨規條要領俱載於左

- 一縣西十里墩秧園實田九十八畝二分每年額租錢
六十九千二百七十二文
- 一縣北七里缺秧園實田七十九畝每年額租錢五十
千零五百二十五文除捐公田外尙有祖墳樹木墓基
神道並田二畝不在捐田之內
- 一縣南三接橋實園田三十三畝九分每年額租錢四
十千零一百九十五文
- 一租價交典生息止許一分俟鄉試之年按月按年計
算若干
- 一鄉試之年酌於六月十五日將歷年息按年之先後

月之多少結算共計租價息錢若干造冊由縣備文移學以憑給發

一租息移學學預於六月十五日示知合學文生有情願鄉試者或係正案或考遺才俱令先期報名查其實無力者總計人數若干應派若干預先示知定于七月初一日在明倫堂給發至監生捐貢及作幕起文應試者不應給予

一徵收租價佃戶自赴庫完納給予收票經承每年量給紙張飯食錢四千文不得私自加租侵撈並私換佃戶租約

宮保總督部堂鐵批朱洪壽捐田收租以爲士子鄉試盤

費洵屬義舉仰江寧布政司查明議詳請獎

巡撫部院汪批仰江寧布政司核明通詳飭遵

江寧布政使司許批仰通州覆核擬議詳司察奪毋違按察使司遇批據詳朱洪壽捐田入學惠及士林洵屬樂善義舉

常鎮通道趙批據詳該縣原任巡檢朱洪壽捐送田二百餘畝入公每年收息存典再爲生利逢鄉試之年以爲寒士盤費好義可嘉

本州唐批既據通詳仰候各憲批示

書院社學義學附

宋王俊父書院在縣西北水澤丁天錫書院在窪子頭

元陳應雷書院在胡安定祠側許芳書院在縣北柴市灣
按以上書院考舊志皆家塾今俱廢

崇正書院在學宮東南隅百步

國朝雍正二年知縣曹樞建邑人胡香山沈宗聃袁士彪冒
璉石景羲石立李士賢朱日躋共斥縣南沙田五百七十
七畝五分零曰育材圩沈宗聃又斥田一百二十五畝曰
復興沙共徵租米三百八十餘担以爲脩脯膏火之資乾
隆十二年改爲育嬰堂

邑人胡香山記如臯故無書院宋以來家自爲塾其載
在邑志者縣西北水澤王堯明書院窰子頭丁天錫書
院安定祠側陳省元書院柴市灣許芳書院然考之舊

乘皆家塾非書院也桐川曹公奉

命並臯以學校人才爲先務嘗咨於衆曰此東南瀕海之鄉

國家財賦之重地而又有舟楫往來斥堠守望之勞其士賢
民情梗上而譁吾以爲皆科條繁瑣舍其本而逐於末
也如臯舊爲文教之區倡於安定行於太原而又有柏
齋石溪淮海巢民後先繼美鄉先生之風方盛大而未
有艾所以長善類作士氣易易耳今諸生之從遊者日
益衆歲課月試其所爲文清詞英辨者日益多而縉紳
之家或能修明胡王之業其餘富而不知教子貧而不
能崇師雖子弟英才偉質多沈錮其耳目聰明而罔有
所振拔謂非長民者之責乎爰謀於鄉士欲立書院延

明師將仿經義治事齋之制焉鄉士曰是役也計非歲有常產不可以興事而垂久遠吾數人者任之其或有濟乎公悅請於上官報可衆乃捐臯南沙之田以爲田得戴氏之宅而更新之既成名曰崇正書院其講堂書室二十有餘間廣可容百人其地在學宮之東南相距數百步司教者得常至而稽之諸生之在書院猶其在學宮也昔縣治內宋有萬竹書院明有修篁書院後人豔稱之以爲有單父鳴琴之遺然以語於教民型俗之大政公不且有過之而無不及哉

雉水書院在縣治東北隅乾隆十二年知縣趙廷健建

按卽明張玉成露香池館故址 邑人范大年別業趙

令捐俸得之改爲雉水書院袁士彪沈全道石立胡申穀李士侃冒天樞石鎬胡之本等呈請捐送崇正書院膏火田七百零二畝五分並入焉其聯事捐銀百金者徐建杓沈全道黃紹祖石立鄭大綸黃衍汪起瀾朱玉徐承浩徐惠徐錦吳慥鄭建陳以璋康五柳捐五十金者典史沈昌國朱濂仲之珍仲之璜仲之琮徐承修沈嗣昌李大韶蘇秉智鄭人瑞捐四十金者徐建中崔永德范樞康五柳捐三十金者仲邦萬范曾耀朱永璉捐二十金者傅源丁益書又季有恒捐送丁家所田八十二畝歲徵租銀三十兩徐建杓捐送市房一所歲徵租銀十六兩其始終董事者黃克業石爲堦鄭大綸徐建

杓沈全道黃衍朱濂徐建中仲之珍

知縣趙廷健記乾隆十年教化翔洽文風丕盛正學碩德之儒臣濟濟盈廷足以軼漢唐而成三代之英乃

命翰林與大小臣工聯詠柏梁體賡歌喜起如遊熙皞之天焉

又

臨幸貢舉院憫恤儒生風簷寸晷進取艱辛爲之

賜詠紀恩曰從今不薄讀書人

綸綍之音海流風動雖窮鄉僻壤莫不感激興起以讀書人自期而況如臯乃胡安定先生故里先生學啟關洛道廣蘇湖而親炙於桑梓者其砥礪奮迅講道考業深入乎三有之域也尤爲不戒以孚廷健於其莅邑也始和月

吉飲射讀法與臯人士揖讓進退其諸魚魚雅雅望而知爲安定弟子與於時薦紳先生及國學鄉校諸生環而請曰如臯舊屬揚郡故郡城書院署以安定臯人士附從之邇年分隸通州合另建講堂用率諸生肄業但先是曹侯於泮宮池南肇基書院有育才圩復興沙田共七百零二畝五分歲收所獲用備師生束脩膏火浸傳浸怠而教與學因之中廢茲但飲金舉事大啟疆宇而不請歸舊田爲多士計恒產其何以計長久乎廷健於是上其事於各上官上官允所請爰卜宋曾文昭公隱玉齋西偏泰山墩之南麓構齋堂書室寢處庖湏罔不具焉從古禮延通籍而優行者爲師俾縣鄉及隣邑

子弟咸來就學月旦望集而申倫常之義諸生業進者
每有賞才富家貧不能裹糧者資之俾獲成田賦之出
入主院事者司之日月有藉月考臚羸歲二會其數有
餘則貯於他庫俟益田以廣其業後遷其旁育嬰堂於
曹侯舊寔小院而以其堂爲別塾課童蒙俟其長始赴
書院受業故以義學爲附庸而統榜其正坊曰雉水書
院如臯射雉借名於左氏春秋而易象爲離麗天明而
華蟲藻火觀文化成郭宏農所賦赤岸銀濤又適當其
境取義於水者正以其文心濬發洋洋浩浩韓之潮蘇
之海足以想見其襟期淵雅也督學尹司空博野公聞
而獎勸之署其堂曰立誠居業且親莅講學流示風聲

吾道大光斯文有幸書院之建其亦安定遺風籟鳴機
動至今日而得一振與夫廢之興也固視夫專任之力
亦必藉衆力之趨茲役之舉非分任諸君子樂善好義
以助其成廷健曷克底此後之總其成者亦如諸君子
之樂善好義焉毋豐已以自私毋橐橐以啟釁毋狎匪
類而戮厥彛倫毋樹朋黨而雷同毀譽庶不負今日之
助其成乎抑吾望受業諸生振振焉循循焉沐浴乎師
儒之教而經明行修文章品識進於三代之英也
邑人姜任修記乾隆丁卯邑侯趙永齋式吾廬而請曰
去年夏五接所示條例事宜首重建書院以興文學隨
邀縣士大夫彙金卜宅延師授徒修辭立其誠有以居

如皋縣志 卷九
業矣故督學尹公賜以立誠居業之額並請史筆記其略以傳之走惟侯以名進士起家大令文章學術海內已洽然從風而社稷經綸之士又必竭盡其所以任父母師保者蓋侯之宅心一塵不染而侯之勤政百廢俱興渙其德音作其士氣飲之食之教之誨之文物盛而功名玉成書院時設直可與金陵之鍾山吳閶之紫陽維揚之安定梅花千秋同一軌也鄉之士大夫若某某者斥田若干頃捐費若干金構屋若干間課士若干人脩脯若干束膏火若干資刊布詩文若干費巨細精粗備物致用不且足以多其好義赴功成侯之美哉然有其與之惟其繼之昭茲來許是盛必傳保此以滋大庶

幾乎書院之不朽也

乾隆十七年王大溥捐送馬塘場張家莊田四十二畝二分歲租銀十兩徐惠捐送掘港場鮎魚灘田一百二十畝歲租銀十二兩石立捐送北門外園田十九畝三分歲租銀十七兩一錢朱濂捐送北門內鶯頸灣坐東朝西店房一所租銀五兩四錢朱學陽捐送與伊弟濂同房租銀三兩六錢濂又捐送東門外域城內基地二方租銀二兩三錢三共房地租銀十一兩三錢唐元音捐送西門外蒲行南首並南廂磨子橋共田五畝草房三間租銀四兩九錢六分黃衍捐送縣南張家圩三至五號田一百十二畝九分九釐歲徵租豆三十一担

三十年徐錦捐送岔河鎮市房一所計五十三間租銀七十兩又田四畝租銀四兩共銀七十四兩

知縣張起鳳記如邑建立書院近二十載初移育才圩沙田五百餘畝供給公用邑紳各有捐助歲入之租僅足備山長脩贖會課士臨期一至欲飲之膏火俾平時寢饋其間道無由也予莅任後敬禮山長引掖生童有志之士日加奮勉而謀及資斧則始基綦薄勸助維艱有邑紳徐良弼者鄉之善士里人凌雲負其貲九百金良弼臨歿遺命子錦呈請捐書院膏火予鑒其忱詳請上憲凌雲猶抗不償雲死其子復蹈父轍歲乙酉予為嚴追欲懲以法以其田房抵錦錦以父有成命涕泣呈

請入冊歸公予維良弼慷慨好施其子竟承厥志不以費財既得旋生靳惜有良弼之創義始得其子之繼美有錦之堅請益彰厥考之誠心是父是子良可嘉也既定案申報大憲兼請褒揚並允可大中丞閣部莊公給額曰繼志成美學憲少宰梁公給額曰承堂繼美守道憲陳公給額曰承志育才絡繹褒嘉雲章焜耀更准勒石以垂不朽徐氏亦可得為善之榮矣脫好義者感而效之踵而增之得更益數倍資斧日豐人才日眾書院增一下帷攻苦之士即藝林中多一東修圭璧之儒豈不以徐氏父子為嚆矢兼有禪於學校也夫田房在岔河鎮市房五十三間歲納租銀七十兩田四畝歲納租

銀四兩並誌以傳永久云

三十六年書院置買金大明東楊蠻河河北田五十三畝
又丁禹川東楊蠻河官河北田十四畝二共租銀二十八兩

三十七年書院置買西場北曹家菴宗篤齋仲雲衢共田
八十六畝租銀二十六兩又置買仲柳原陸家淺北首田
二十二畝租銀七兩五錢

五十九年喬普江蔡捐送常盈沙范家圩東三號田二十
三畝歲徵米每畝七斗共米一十五担一斗知縣曹龍樹
暫改每歲納錢九百文共錢二萬七百元又契外借券銀
一十三兩俱送入書院膏火

六十年陳栢林名下租種田八畝租錢二千四百文捐送
人無稽

院長題名錄

周植 崑山人乙丑進士

陶鎔

王康佐 號厚齋句容人壬戌進士翰林院

胡彥穎 號石田浙江德清人進士翰林院編修雲南土考

朱嵩 號維嶽浙江紹興人進士江西奉新縣知縣

馬應榴 號星實浙江桐鄉人辛巳進士鴻臚寺卿

錢維喬 號竹初常州人舉人

宮煥綸 泰州人

史鳴臯 號笠亭邑人辛未進士廣西柳州府知府前翰林院庶吉士

蔣宗海 號星巖丹徒人 召試中書壬申進士

吳哲 號枚原常州人進士

馮垂範 丹徒人乙酉舉人

熊大有 江西人舉人

錢仲鶴慶 號松嵐泰州人甲戌進士四川大邑知縣

何廷模 號西舫浙江仁和人丁卯舉人海州知州前邑令

陳森 江寧舉人

黃世墀 號柏心徽州人明經舉孝廉方正

曹復元 號月帆金山人丙辰舉人

陳玉敦 號受棗浙江錢塘人舉人內閣中書舍人

許承志 江寧人癸酉舉人

黃洙 號滌人揚州人庚戌進士山東肥城知縣

宮增祐 號節溪泰州人癸酉順天副榜

秦永年 號雪飀無錫人廩貢候選訓導

張士凱 號 滁州人乙未進士直隸懷安知縣

社學明洪武八年建四十二里額設社學八十四所

嘉靖三年知縣梁喬升改設一十五所在縣治者二曰育

秀曰正蒙馬塘場曰小治掘港場曰回瀾豐利場曰敦風

東陳鎮曰培英丁堰曰興賢白蒲鎮曰新民八里莊曰清

源謝家店曰樂賢芹湖曰春陽石莊曰時雨西場曰時雍

立發曰明善 曰存性

萬曆十五年知縣劉貞一改設七所一在中禪寺右一在

王公祠左一在西門外一在丁堰鎮一在白蒲鎮一在馬塘場一在掘港場

四十五年守備趙千駟設掘港場社學一所邑人章純仁易其名曰清溪書屋設規約條目十二曰立志曰虛心曰端品行曰開眼界曰務實學曰去浮靡曰毋勦襲曰勿作輟曰親正人曰惜寸陰曰損嗜欲曰求義理以上諸社廢者過半惟三鹽場尚存

義學在雉水書院隔垣

國朝乾隆十二年知縣鄭見龍建

知縣鄭見龍記古者七歲入小學十五入大學義學之制卽小學也萃處童子於其中授之句讀教之灑掃應

對進退其理不必精其事不必大其功不必煩由未至本於以育德易曰蒙以養正聖功也成人有德豈不以小子有造哉臯之義學舊附崇正書院趙永齋先生卽并崇正入雉水書院後欲改育嬰堂爲義學未幾調去余踵而成之大門兩翼屋五楹養正堂五楹左右廊悉具又後室三楹庖湏五楹

二十九年知縣崔正音重修知縣宋學灝接修邑人汪爲霖捐銀一百兩徐觀光觀政捐銀一百兩黃大音大鶴大鵬捐銀一百兩石鉉銳鎬鉅捐銀一百兩仲之琮之璜捐銀五十兩仲元鰲元龍捐銀五十兩鄭景誠同姪以簡捐銀四十兩康六書捐銀四十兩朱昂朱樾捐銀四十兩鄭

國瑞同姪鄭韶鄭曉捐銀四十兩崔林崔有翼有典有子捐銀四十兩胡之本捐銀三十兩徐錦捐銀三十兩董其事者朱昂胡之本石鎬黃大鶴沈爲轍等

知縣崔正音記書院與學校相表裏學校以育才而書院以講學道相需爲理矣方今

聖治

光華郡邑皆修書院皐故人材之藪邑紳捐建雉水書院率諸生肄業其中歷三十年余承乏斯土簿書之暇閱諸生所爲文煇煇炳炳蔚爲偉觀而知書院之大有造於多士也乃其棟宇日就傾圯擬以修葺爲任與士大夫常議及之僉稱善維時學宮亦久闕修庀材鳩工兼營不易不得不權乎輕重以爲後先故少遲之今修學

事竣復爲之勸士大夫踴躍前議皆克繼先人志事捐貲爲同人倡而董以觀其成余惟皐之士大夫雅能趨赴公事振興文教爲桑梓光顧以學宮繁費後卽踵是役意或難之不圖經始秋仲落成冬孟七旬而功俱舉美輪美奐易舊徹新何成功之速歟非好義而力均不及此書院之西嚮有義學傾圯久矣茲亦並加修整予喜諸生絃誦於斯者獲有寧居以樂羣敬業又幸久於茲土獲觀公事之次第有成而尺寸以贊文治也於是乎書

嘉慶十年署知縣姚鳳楷重建義學紳士朱大剛范家駒張灝顧金壽紀朝幹石蘊岐等董理其事

掘港場義學

乾隆十二年掘港場里人程公能等創建於文榮巷吳廷壁等續修

赤岸社學在縣治北李家堡嘉慶二十一年鎮人童灝捐錢一千二百貫周佩華捐錢二百貫彭壽捐錢二百貫買屋五十餘間田四十九畝五分秦文士秦文達捐送周圩溝田二十五畝於二十二年春請檔舉行董事者熊純道叢之錡康政唐兆鳳唐兆鸞仲振業仲振威彭高繆元光周德昌厥後童灝家媳彭氏次子根俱捐貲勸事克承先志焉知縣賀崇禧記建學以儲材也而創之之始爲最難何者儲材天下之公義當其圖始則非其子孫身家之謀

耳目便安之適必將不勝其畏蕙瞻顧之思况又並出其身家耳目之所利者以爲之乎記曰家有塾黨有庠州有序國有學今天下郡邑莫不有書院之設義學之制然大都非

朝廷之給帑卽衆力之共舉所以鄉曲村市之間社學又寥寥焉蓋家塾黨庠之義不明而人材之不能廣育也久矣去年冬予權知如臯縣事巡政黃君學谷來言其所隸之赤岸有周生佩華彭生壽者於其地建社學方成而請爲記詢其顛末則爲言是舉實始於佩華之父珊性壽之父希堯其能不吝已財而獨力任之者爲監生童顯二人者舊爲婚姻故能襄力以迄於成云學在

鎮門臨大河有房五十餘間中設進修堂爲生徒講業所堂之後爲培桂樓奉奎宿其東爲雙願堂董其事者議公地也餘皆諸生誦讀寢興處又東偏有園爲假山其中引水環之構亭曰會心雜植嘉花異木以供遊息又有田五十餘畝歲出租以爲束修膏火修葺之費噫何其詳且備也臯地處海濱於江南爲下邑赤岸又臯邑村鎮之一耳而數人者乃獨念其地距城稍遠不能以時詣書院聽講貧無力者或不能延師則人材之中棄爲可惜所以父子相繼捐貲協力以卒底厥成蓋義氣本乎天性而好學及乎鄉人以視世之家有餘貲非爲子孫計長久卽侈園亭之勝縱耳目之適者其所見

之大小爲何如也黃君又言一生將於其旁別建育嬰施耆之局果爾則其仁心爲質由儲材之義以推廣之者且未有既也是皆可記已

周佩華自記畧夫有必爲之志者無不成之事遲速廣狹何論焉如吾鄉之設社學亦止延黨庠術序之舊迺必遲之又久而後成其遲之又久而卒底於成非成之者力也有志乎其先者矣華自早歲侍先府君膝下見與外舅童公怡中談論鍾山紫陽各書院事宜津津不絕口卽臯城雉水書院及義塾士林咸沐其休惜吾鄉僻處海濱艱於就學而寒儉子弟延師又苦力綿雖有可造之資多沈錮其耳目聰明於此而欲長善類作士


如皋縣志 卷九
氣非於里中建一社學不爲功其時彭希堯先生有同志先生亦吾外舅朱陳戚也未幾棄世己巳歲先府君又見背希堯先生子澹菴與予爲莫逆交吾外舅因以社學勗之曰爾兩人克成吾志亦以繼爾先君子志也丙子秋余赴省試外舅病革彌留中秋後已絕粒矣復強進粥糜數勺冀稍延以待華歸及進謁卽呼同澹菴至榻前授錢一千二百貫諄屬社學之事越一日遂逝嗟乎老成繼殞夙願未酬倘更遷延歲月於心安乎於是引爲己責竭蹶不遑各捐資以勸厥成并邀同人相董理買仲姓舊宅一所門臨大河河水清漣頗饒文秀雙橋相夾儼有彩虹明鏡之觀門內額以赤岸社學赤

岸吾鄉舊名也兩翼屋十楹講堂四楹顏曰進修堂取君子進德修業之義也川堂三楹左右廊各二楹重屋五楹上祀七魁顏曰培桂樓以培養人材爲義而道書云文昌主桂籍士之多積善者乃克登之則桂之必賴乎栽培而毋容自撥其本根又一義也講堂東偏屋三楹顏曰雙願堂謂願天常生好人願人常行好事也同人

有公議舉集於此此外庖福悉具樓後羣屋十餘楹分置育嬰施榭所次第布之未竣也東隅荒園數畝舊有小池古樹構亭其間顏曰會心築假山架小橋種名花植美竹翦然嫣然與牆外沿河樹木相掩映學者退息悠游如登濠梁會心不遠蓋至此而社學之規模粗

定矣獨是華之願不止此也竊怪臯邑豈乏瑰偉之材
乃自乾隆乙未後無有成進士者四十四年豈文運不
振所致歟抑講求之未得所宗歟嘗論科舉外也學古
人之學內也必欲養其內以致其外由乎今以進乎古
則須延東南知名之士考德問藝一汰吾鄉積習俾不
至冥然而趨庶文教駸駸乎其日上耳無如田產無多
經費不足欲擴而大之姑俟諸異日此所以抱憾於歲
事之太遲而立制之猶狹歟尚憶老泉云功之成不成
於成之日必有所自起前人數十年之苦心至今日而
始基甫具惟在弦誦其中者文藝一歸雅正德行崇尚
中和彬彬乎人文蔚起風俗大淳庶不負先人創建之

志而華與澹菴之所厚望也夫



學校
 如皇縣志
 卷九
 三



書院義學圖



如皋縣志卷九終

如皋縣志卷十

禮典 慶賀 開讀 宣講 迎春 耕藉 新任

賓興 入學 祈禱 救護 廟祭 壇祭

祠祭 羣祀 歲時

天高地下萬物散殊而禮制行焉禮達則分定士大夫敦厚周慎為編氓矩矱農工商賈有所矜式各自檢束風俗蒸蒸日上也詎不美哉志禮典

慶賀

凡遇

萬壽元旦冬至三大節文武各官前後穿朝服七日遵照會典望

闕行三跪九叩首禮



皇后十秋儀節同

儀注凡慶賀預設香案幄座於廣福寺至日五鼓各官齊集贊禮生贊排班各官以次就拜位文東武西禮畢退班

開讀

凡遇頒到

詔書地方官員遵照會典具龍亭綵仗鼓樂朝服出郊迎接行

禮

儀注本處官員出郭迎接北向行三跪九叩首禮鼓樂前導入城至廣福寺門外眾官先入文武分班序立候龍亭至排班行三跪九叩首禮禮生贊

詔至開讀案前宣讀眾官跪聽聽畢眾官再行三跪九叩首

禮禮畢退班膳黃分頒

宣講

每月朔望文武各官遵照會典序班行禮宣講

聖諭廣訓各條

儀注每朔望黎明各官補服詣

聖廟

文武廟火星廟行三跪九叩禮次詣城隍廟行六叩禮各詣本衙門土地祠行三叩禮上午於公所設

聖諭牌各官齊集行九叩禮畢分班坐地禮生鳴鼓振鐸軍民人等敬聽講畢各散城內公所或儒學廣福寺城隍廟

城外則近城各寺觀輪流宣講每春二三月儒學官及
佐貳分向四郊村鎮擇本村生監或塾師宣講

迎春

每歲立春有司官遵照會典迎春於東郊出土牛

儀注先期塑造春牛芒神前一日各官朝服具鼓樂儀
仗出迎於東郊行二跪六叩首禮昇至縣治儀門外之
左安奉幄次土牛南向芒神西向各官三揖而退立春
日早晨設香燭酒果按時行禮獻爵讀祝二跪六叩首
禮畢舉春牛至儀門外中道各官執綵仗環立春牛兩
旁贊擊鼓樂工播贊鞭春各官環擊春牛三匝禮畢
更朝服詣各廟行香芒神送城隍廟

耕藉

每歲仲春亥日巳時祭

先農壇午時行耕藉禮

儀注祭日供神位於壇上承祭官衣朝服行二跪六叩
首禮各官依次行禮祭畢送位入祠更蟒衣不穿補服
詣藉田行耕藉禮一官捧青箱一官播種各官俱用右
手扶犁左手執鞭各行九推禮農夫終畝耕畢各官更
朝衣望

闕行三跪九叩首禮

新任

凡新官上任擇吉進署照儀行禮

儀注凡到任先期一日至城隍廟齋宿次日具公服焚祝文訖乘轎列儀仗鼓樂導引進署先祭儀門具羊豕讀祝文行三叩首禮詣大堂前設香案望

闕行 九叩首禮至大堂拜印行九叩首禮公座開印皂隸排衙書吏叅庭次祭土地祠次祭竈井次日行香閱城清獄如常儀惟儒學官不行齋宿禮

賓興

大比之年凡督學科試優等者行賓興之禮

儀注先期儒學官將奉准紅批移送縣官擇期具書啟集諸生至日諸生先集學宮明倫堂同拜謁

先師 具牲醴祭奎樓訖儒學官具酒果於明倫堂饌送酒一

行儒學官親送諸生至縣堂縣官張綵幄縛綵橋設酒餚鼓樂縣官親奉觴授几拜揖如儀就坐儒學官賓位南向縣官主位北向諸生東西列坐酒三行起由中門步綵橋出至北郊萬壽院具酒果酒一行送諸生登舟揖別

入學

凡督學取進文武新生紅案發到縣官送學肄業

儀注先期擇日傳集新生至日縣官於大堂公座簪花掛紅諸生行庭叅禮縣官答禮由中門鼓樂導出縣官率新生謁文廟行三跪九叩禮詣明倫堂前設香案望闕謝恩行九叩禮畢升堂更蟒衣補服與儒學官行交拜禮

次新生見儒學官行四拜禮學官拱受兩拜答揖兩拜

祈禱

凡遇亢旱地方官遵照會典設壇祈禱

儀注凡境內亢旱擇地設壇移牒城隍神廟先集僧道淨壇官民致齋禁止屠宰不理刑名戴雨纓各官素服辦事步詣壇所每日行香二次拜神行六叩禮如得雨謝神用羊豕穿補服行禮祈晴驅疫同

救護

凡遇日月食文武各官遵照部頒欽天監推算時刻齊集於縣著大堂救護

儀注凡救護日月食設香案於露臺初虧食甚復圓俱

行三跪九叩禮初虧蝕甚素服復圓朝服初虧行禮後樂工進鼓禮生贊長官擊鼓三通官三擊禮生贊眾鼓齊鳴由是樂工吹角搥鼓僧道鳴鑊隸役擊鼓鳴鈺相續不絕聲至復圓乃罷

廟祭

至聖先師廟詳載學校志

崇聖殿詳載學校志

關帝廟每月朔望官僚行香歲春秋仲月祭用戊日雍正年改中丁日乾隆年欽天監選日頒行及五月十三誕辰儀注祭品凡三祭牛一羊一豕一遵豆各十登一釧二簋二籩二俎一尊一爵三帛一儀節與儒學聖廟同

曰武廟

祝文維

帝浩氣凌霄丹心貫日扶正統而彰信義威鎮九州完大節以篤忠貞名高三國神明如在遍祠宇於寰區靈應丕昭薦馨香於歷代屢徵異蹟顯佑羣生茲值仲春仲秋行祀典筵陳籩豆凡奠牲牲尙饗

雍正三年給事李蘭奏請關帝三代俱封公爵加號尊崇八年奉文於解司地丁內撥銀六十兩以供祭品

乾隆三十二年加

封忠義神武靈佑關聖帝君

六十年改神牌勅封二字為供奉

三公殿安設神牌紅飾金書河漢合璧奉

勅封曾祖光昭公居中

勅封祖裕昌公居左

勅封考成忠公居右

儀注祭品凡春秋二仲祭關帝日先詣後殿行禮羊一豕一籩豆各八帛各一儀節與崇聖祠同

祝文維

公世澤詒麻靈源積慶德能昌後篤生神武之英善則歸親宜享尊崇之報列上公之封爵錫命優隆合三世以肇禋典章明備恭逢誨吉祇事薦馨尙饗

文昌廟嘉慶六年

上諭文昌帝君主持文運福國佑民崇正教闢邪說靈蹟最著海內崇奉與關聖大帝相同允宜列入祀典春秋祭祀該地方官敬謹致祭是年八月十八日設祭如有地方稍遠明春遵行欽此如皋縣係七年春舉行

儀注祭品每歲春祭以二月初三日聖誕為祭期秋祭俟頒日歲二祭每祭支地丁項下銀二十兩牛一豕一羊一簋豆各十爵三登一釧一簠簋二篚帛一俎一尊一行三跪九叩首禮與關帝廟同

祝文雜

神蹟著西垣樞環北極六筐麗曜協昌運之光華累代垂靈為人文之主宰扶正久彰夫感召薦香宜致其尊崇

茲屆仲秋春用昭時祀尙其歆格鑒此精虔

後殿太常寺奏祭祀儀文敬查雍正三年

勅封關帝曾祖父為公爵加號尊崇製牌安奉今文昌三代姓名

無確據未便請加封號謹擬增製牌位一分牌面用文昌帝君先代神位字樣紅飾金書清漢合璧遇祭期設三案用豕一羊一爵各三釧各二簋各二簋各二簋各八豆各八篚各一俎各一尊各一行二跪六叩首禮照關帝廟後殿祀典致祭

祝文祭引先河之義祝崇反本之思矧夫世德彌光延賞斯及祥鍾累代炯列宿之精靈化被千秋緯人文之主宰是尊後殿用答前庥茲值仲春肅將時祀用申告

潔

神其格歆

天后宮雍正十一年郝玉麟奏稱天后明神功昭清晏德庇商民應春秋祭祀等語部議春秋祭祀應照龍神致祭之例令督撫主祭凡有江海處俱受天后庇護宏施建有祠宇而未設立祀典亦應如該督所請令各省照例致祭並查明所屬府州縣原建天后祠宇擇其規模宏敞之處令地方官修葺照例春秋致祭奉

旨依議乾隆五十三年奉

旨加封顯神贊順護國庇民妙靈昭應宏仁普濟天后聖母元君

城隍廟每月朔望官率僚屬展謁春秋二仲戊日合祭於

山川壇凡境內水旱疾疫致禱行兩跪六叩旨禮

火星廟每歲六月二十三日致祭朔望行三跪九叩首禮

馬神廟每歲春秋仲月上戊日營官祭

劉猛將軍廟每歲冬至後第三戊日及正月十三誕辰二

祭羊豕帛爵各一行一跪三叩禮

祝文惟

神英勇威靈顯赫裕我田疇蝗蝻泯迹禾黍無傷感仰神澤茲值蠡辰理宜慶德牲醴奠獻來歆來格

福吳富農龍王廟每歲擇仲春秋辰日祭

祝文維

神象應乾元功施靈雨佑茲吳會爰錫福以降祥相彼農

夫庶既富而方穀茲當東作方興之日展先時虔告之黃茂既登西成虔報之儀式薦馨香仰邀神格

壇祭

社稷壇每歲仲春秋上戊日黎明各官朝服長官主祭餘官陪祭儀與聖廟同

乾隆九年奉文頒發祭器帛一黑色羊一豕一爵一釧二簋二籩二籩四豆四

祝文維

神奠安九土粒食萬邦分五色以衣封圻育三農而蕃稼稽恭承守土肅展明禋時屆仲春敬修祀典庶九九松栢鞏磐石以無疆翼翼黍苗佐神倉於不匱尙饗

先農壇每歲仲春亥日文武官耆老農夫致祭儀節與社稷壇同

祝文維

神肇興稼穡粒我蒸民頌思文之德克配彼蒼念率育之功陳常時夏茲當東作咸服先疇洪惟九五之尊歲舉三推之典恭膺守土敢忘民勞謹奉爨章聿修祀事惟願五風十雨嘉祥恒沐於神庥庶幾九穗雙岐上瑞頻書乎大有尙饗

風雲雷雨山川城隍壇每歲春秋仲月上戊日祭壇設三位風雲雷雨居中山川居左城隍居右風雲雷雨帛四山川帛二城隍帛一俱白色儀與社稷同行六叩禮

雍正七年以雲師雨師庇國佑民靈應顯著宜特建廟崇祀禮部議覆查前明禮雷雨壇在社稷壇西風雲壇在社稷壇東今應建雷師廟於西方雲師廟於東方雷師照古制於立夏後申日祭雲師依會典合祭之期每歲秋分後三日致祭

〔祝文維年月日縣官某敢昭告於

風雲雷雨之神境內

山川之神

城隍之神曰惟

神贊襄天澤福佑蒼黎佐靈化以流形生成永賴乘氣機而鼓盪溫肅攸宜磅礴高深長保安貞之吉憑依鞏固

實資捍禦之功幸民俗之殷盈仰神明之庇護恭修歲

祀正值良辰敬潔豆籩祇陳牲幣尙饗

常雩壇乾隆八年奉行每歲孟夏月上辛日於先農壇上

合祀先農社稷風雲雷雨山川城隍之神儀與社稷壇同

〔祝文恭膺

詔命撫育羣黎體彤廷保赤之誠勤農勸稼推葑屋資生之

本力穡服田令甲爰頒肅舉祈年之典惟寅將事用申

守土之忱黍稷維馨冀明昭之受賜來牟率育庶豐裕

於蓋藏尙饗

邑人冒國柱云雩者禱雨祈年之名月令云命有司爲

民祈祀山川百源大雩帝用盛樂命百縣雩祀百辟卿

士有益於民者以祈穀實誠重典也向來雩祭祝版雖書昭告於先農社稷風雲雷雨山川城隍之神而壇上僅設八蜡木主名實不符矣今已改正

邑厲壇每歲清明中元十月朔致祭城隍位於壇上列厲神牌於堂下兩旁書無祀鬼神之位前一日主祭官詣城隍廟焚告牒至日僧道諷經各官補服行禮前後三叩中間三獻祝文讀畢同楮幣焚之祭品羊一豕一米十二斛明洪武初祭厲祝文維年月日縣官某爲祭祀本縣闔境無祀鬼神欽奉聖旨普天之下后土之上無不有人無不有鬼神人鬼之道幽明雖殊其理則一念冥冥之中凡無祀鬼神或終於前代或歿於近世或兵戈擾攘

流徙於他鄉或人烟斷絕久缺其祭祀姓名泯沒於一時祀典無聞而不載此等孤魂精魄未散悲號於星日之下呻吟於風雨之時凡遇人間節令心思陽世魂杳杳以無歸身墮沉淪意懸懸而望祭興言及此憐其慘悽故勅天下有司依時享祭在京都有泰厲之祭在王國有國厲之祭在各府州縣有郡厲之祭期於神依人而血食人敬神而知禮仍命本處城隍以主此祭今某等不敢有違謹設壇於城北以三月清明日七月十五日十月一日置備牲醴羹飯專祭本縣闔境無祀鬼神靈其不昧尙饗

鄉厲壇詳載建置志

祠祭

鄉賢名宦二祠詳載學校志

忠義孝弟祠詳載學校志

胡安定先生祠每歲春秋仲月上丁日致祭主奉生員二人行三獻三叩禮

祝文學兼體用門育英才上傳洙泗之道統下啟濂洛之淵源既崇祀於泮宮更專祠於梓里茲屆仲春敬修

祀典兼以伯子杭州節度推官胡公志康仲子永州知州胡公志寧季子宣議郎胡公志正配尙饗

范文正公祠每歲春秋有司官丁祭主奉生員一人豕一羊一籩豆十帛一行三獻六叩禮

祝文維公學貫天八才兼文武誼敦九族澤被萬民長堤捍海戴德彌深茲屆仲春謹以牲醪敬申奠獻

三忠祠每歲春秋仲月致祭行三獻三叩禮

祝文維宋三公精英足式忠義常昭或奔走以勤王或遷徙以見志秉彝各守洵矢念之靡他陽德方亨見誓心之不二道同志合事異勢殊溯遺跡於當年英風如在妥幽靈於此日正氣常伸歆此苾芬昭茲典禮

許忠愍公祠順治十二年乙未准著禮臣議諡諡曰忠愍

諭祭一壇

命有司建祠致祭春秋勿替行三獻三叩禮

祭文

生扶名教表正百官沒繫綱常羽儀一代惟天地有正氣於江海鍾偉人爾故明吏部文選司員外郎許直官有餘清士窮見節當國破君亡之日正主辱臣死之時而爾乃繫縶明心賦詩見志從君無路志士每多苦言殺賊有心孤臣爲之雪涕展也百官之長奮乎百世之風祀典特隆昭茲英魄

邱公祠每歲春秋仲月上戊日致祭行三獻三叩禮

祝文惟靈英文雄武保障東方勦除倭寇恩遍海邦捐軀報國名著旗常生前忠勇身後流芳皐民感德專祠烝嘗今屆仲春秋謹獻牲觴英靈來格歆此馨香

知縣李衷純移文竊聞郡邑之有祀也凡以崇德而報功故生于其鄉而能端矩垂範者則祀之宦于其地而

能捍患死事者則祀之卽非生其鄉宦其地精忠大節殉國赴難偶過其境扶萬古綱常振百代人心者亦祀之此三者均祀法所必載使有舉有不舉爲缺典卽舉矣而配享不倫位次顛倒爲失序皆守土者之責也臯雖小邑如前所應崇祀代不乏賢顧舉矣不盡舉舉矣不免配享不倫位次顛倒是缺典與失序皆有之卑職春秋裸將目擊而不寧於心久矣敢據臆以請如在宋則有天章閣侍講安定先生胡公瑗宏修道德博極羣書倡明體適用之學建經義治事二齋以成就一時人才爲百世師道之宗有龍圖學士左右諫議王公覲忠肝義膽折檻批鱗爭明黨爭新法爭鬼章累疏極論蔡

確章惇韓縝張堯胡宗愈等朋奸屢遭貶黜百折不回
所至政治更著清肅有吏行冰上人在鏡中之謠千載
下猶想見其直節是二公者所謂生其鄉而能端矩垂
範者也有監西溪鹽倉范公仲淹憫海波之衝嚙奏請
於朝築捍海堤高一丈五尺闊三丈綿亘百餘里隱隱
如長城至今濱海之民得晏居樂業不爲菑是范公者
所謂宦其地而能捍大患者也有都統制岳公飛驅逐
金虜嘗經畧通泰提兵過臯中道苦渴得聖井欄汲而
不竭公神異之名其井曰度軍可見忠誠所感天地效
靈有右丞相文公天祥以勤王從臯潛行入海晝夜匍
匐追騎每每相迫時縣令朱省二固受虜命者公不知

而過幾爲所縛賴張阿松得脫聞關萬苦不可名狀是
二公者所謂精忠大節殉國赴難偶過其境植萬古綱
常振百代人心者也在國朝則有御史中丞鄭公曉當
世廟時倭夷入寇臯故無尺寸之郭人心惶惶皆思逃
竄公亟疏帑金三萬繕成城七里不惟當日百萬生靈
得免兵燹今而後室家相保皆公賜也有叅戎邱公陞
者故公裨將夙稱驍勇公命守臯與倭相持經年數戰
數勝倭不敢犯後遇于野援兵不至竟爲所殲凜凜有
睢陽南霽雲風是二公者亦所謂宦其地而能捍大患
能死王事者也七君子事雖不一皆臯之威鳳祥麟咸
當尸而祝之以光俎豆乃胡王文鄭邱五公已祀而范

岳兩公尚湮沒未舉是功在萬世者不蒙一杯之酌忠同死國者竟異弔古之薦也固為不安第安定之專祠當矣無容喙矣以信國之主而附於龍圖之廟則主與賓爭席以中丞之位而列於叅戎之旁則尊與卑倒置諸公有靈未必不吐單職以龍圖之墓見在城中牛羊來牧樵採並侵甚為可傷將圍其四周建一小宇舉其主而獨祠之庶即以蒸嘗為典守在文山祠則舉武穆而並祀焉蓋二公盡忠宋室同受禍慘烈同過臯踪跡同千古遺憾令人噦吁欲涕同也邱將軍之祠仍其舊專享可矣別創一祠舉文正端簡合祀焉蓋二公皆有大勲勞於茲土文正始雖小吏後至執政與端簡爵位

相埒端簡之節義經綸亦庶幾彷彿文正應懽然把臂入林耳如是則應祀者無不祀亦無不當缺典失序之弊庶可免乎夫當中外多故士習頹靡之秋倘因表章先賢而懷忠效赤者毅然感發興起於世道人心未必無小補也故卑職不敢以迂緩而陳其狂瞽如此

昭忠祠禮部則例每歲春秋仲月擇吉日致祭羊一豕一帛一果實五爵三承祭官行兩跪六叩禮

嘉慶七年奉

諭旨凡陣亡官兵應入昭忠祠者各在本籍地方擇廟旁蓋屋致祭臯邑附通州

關帝廟門懸

勅建昭忠祠額內供陝西河州副將伊犁陣亡特贈總兵官崇

祀昭忠冒重光

節孝祠每歲春秋仲月丁日致祭行三獻三叩禮

祝文節凜冰霜心同金石稟天地之正氣何殊孝子忠

臣樹閭閻之儀型不愧共姜令女克全一生之名節允

享百世之蒸嘗茲當仲春秋聿隆祀典敬陳俎豆以報幽

貞

烈女祠儀注祝文與節孝祠同

羣祀

句芒立春日祭

祝文惟神令司青帝德應蒼龍北陸暄回正草木萌動

之日東郊氣轉乃天地發生之初某等備官茲土喜近

載陽樂迎唱角敬作拖鉤仰祈神力優我田疇

旗纛考試外場日祭

祝文惟神樹立軍門每揮兵而奮武招展壇上恒却敵

以稱雄

聖天子嘉鷹揚之功大將軍生威嚴之色武侯陣裏八方虎

氣凌霄細柳營中五色龍文蔽日茲當臨場試武之日

正是為國掄才之時仰祈神力佑我士子謹告

儀門新令上任日祭

祝文門司出入闐闐維時闔焉闐焉賴神鑒之正人必

進妄人必黜苞苴夤緣幸令勿入藉神威靈防閑為密

牲醴奠獻來歆來格

儒學土地神每歲春秋仲月祭行一跪三叩禮

祝文惟神職司下土位正中央培我桃李護我宮牆今

當仲春理宜告祀謹以牲醴用申常祭

歲時

正月元旦設糕果謝天地宅神祀祖像拜家長賀親友與
他方畧同滿城爆竹聲不絕是日俱食隔歲飯曰陳飯翌
日始浙米雜果餌炊之曰開生禁掃除次日開井廁將夕
家家點天燈樹竿匝月登城望之燦若火錦立春前一日
迎春東郊士女聚觀至日鞭春之後樂工鼓吹送紳士土
牛芒神農民拾碎土布於田以祝豐年家作春餅延客啜

蘿蔔亦辛盤遺意元宵前二夕試燈鑊鼓笙管火樹星橋

雜還道路小兒各執手燈嬉遊成隊戶內皆掛包燈先是通州

包進士稱修所製燈絕佳人爭市之謂之包燈數烟花

十年後倣其意而製之者工巧華燦價亦不貲爆五夜不休戶製米丸相餉名圓宵子婦炙米糕供老人

謂之接腰可免腰痛農家束薪作炬燒田塍宿草曰照麻

蟲以火色紅浚占水旱爆秫米作花散置壁隙間謂為鼠

納婦女伴相攜遊集賢里及泮池曰走三橋謂文德武定

集賢橋也祝孕者密攜橋甓以歸或請紫姑卜休咎好事

者懸采製燈謎以為歡笑十八夜落燈後塾師以次開學

二月三日士人祀文昌神聯文酒之會春分前後戊日為

春社城市不甚矜尚村人咸賽土神以祈年穀或云社酒

治龔十五日花朝名撲蝶會好事者置酒園亭或嬉遊郊外人家咸剪碎彩為百花掛紅又以是日陰晴卜果實繁稀十九日婦女為觀音誕會

三月上巳修禊於城北雨香菴三台山碧霞山水繪園諸

處清明祀先展墓亦與他方同士女踏青四郊至暮插柳

以歸小兒放風箏風箏之大者徑丈餘箏鳴霄漢燈徹雲衢甲於天下者也農人是日

漬種起至穀雨而遍是月風箏漸止皆放地瓮地瓮者截竹為之大者繩提小者線纏旋轉地上厥聲宏遠名曰空鐘古諺楊柳青放空鐘今訛為放風箏

四月立夏日家食鷄鴨卵烹茗蓬菜老人忌坐門檻可免

厄夏之病田家布稻種於秧池初八日女冠浴佛櫻桃九

熟薦麥仁蠶豆新茶擣玫瑰花作糖霜

五月端午懸艾貼符以角黍相饋兒女佩綵縷庭中掛鍾

進士像正午修合辟邪丹藥飲雄黃菖蒲酒送諸毒蟲間

有龍舟競渡道多醉人芒種前得雨種禾為梅秧夏至為

時秧至小暑則無及矣十三日官府小民市井船戶無不

作關聖會者又名竹醉日移竹必活

六月六日曝衣曬書入伏造醬踏麩製瓜蒞農家曬五穀

是月水車耳水遍滿溝渠

七月七夕士人祭魁斗兒女陳瓜果望綵雲乞巧中元節

士民祀先僧設盂蘭盆會夜施斛食沿河放燈晦日俗謂

地藏佛開眼家家點五色地燈比戶相接如白晝南門外

地藏廟前燈棚極盛或就池沼製荷花龜魚舟舫名滿池

嬌又有取各色瓜茄量其形勢鏤作人物鳥獸魚龍奇巧百出名曰瓜燈觀者塞途

八月秋分前後戊日爲秋社報土神也是日造醋亦釀白酒十五中秋節以月餅相饋遺有祀月之盤有賞月之宴清歌畫舫間有儗秦淮遊者往往達旦是月黍稻登場小

兒踢毽子如踟躕之戲

古諺楊柳死踢毽子

九月重陽市中作糖糕剪五色小旗售之登高賦詩擘蟹螯飲酒滿城貼菊花招紙邀人看賞異花洋種無不備雜以鷄冠花雁來紅秋色尤佳祀先展墓與清明節畧同然是秋祭須在十月朔前

十月朔日祀先祖如清明節小雪寒菘最美家家醃冬菜

蕎麥新收春仁作飯磨麪爲餅餌合餽美於諸穀

十一月冬至前一日謂之小至民間具酒醴祀先祖展遺像略同除夕至日拜賀閉市一日

十二月初八日作佛會以諸果煮粥是月造醋釀酒二十四夜用湯餅紅豆飯送竈神逐日蒸糕饅饋歲除夕謝神祀祖換桃符門神打白灰印插芝麻稽至晚接竈圍爐守歲熬松柏枝於中庭謂之化枳盆辭歲聽卜放爆竹鳴鑼鼓徹夜達旦

如臯縣志卷十終

如臯縣志卷十一

軍政 鎮戍 分隸 海防 兵額 擄港營圖附 江防 倭海防圖附 綏寇

易曰王公設險以守其國書曰其克詰爾戎兵雖太平無事宜思患而預防之臯東臨大海南控長江地利固雄矣而因地立制神而明之存乎人端在撫御之有方也志軍政

鎮戍

唐以韓滉為鎮海軍節度使

梁開平二年以太尉劉隱兼靜海軍節度使

周顯德五年拔南唐靜海都鎮制置院陞靜海軍

按馬端臨輿地考靜海周縣有狼山蔡港餘慶石港西

寨五寨

宋建隆通州立靜海壯武捍海奉化諸軍

熙寧通州立護聖宣毅軍

建炎四年以岳飛爲通鎮撫使

按紹興中公嘗將兵過臯道渴得井汲盡泉輒溢出公嘆異臯人遂名度軍井又宋史李綱請於沿淮河帥府置水兵二軍要地別置水兵一軍次要地別置中軍詔善舟楫者充立軍號曰凌波樓船軍其戰艦有雙車得勝十棹海鰲大飛旂捷防沙平底水飛馬水哨馬之屬紹興元年以劉光世領真揚通泰楚州連水軍

按寶祐景定後江淮沿流堡隘相望守禦益繁民勞益

甚

元至元十七年沿江淮諸路萬戶府招集答刺罕軍受拔都節制

按初下江南募死士從軍號答刺罕南北旣混一散之其人遂羣聚剽掠至是復歸部領

二十二年改江淮江西元帥招討司爲上中下三萬戶府蒙古漢人新附諸軍相參作三十七翼每翼設達魯花赤萬戶副萬戶各一人隸所在行院

按元史揚州泰州隸下萬戶二十二翼內翼析爲弩手保甲新軍水軍

至正七年沿江盜起宋文瓚上言江陰通泰江海之門戶

如皋縣志 卷十一
宜急選智勇以任兵柄不聽

十三年五月張士誠起兵陷通泰據其城

明洪武初揚州設衛三內屬所十四外屬所三建立兵府掘港營每歲汛期委揚州衛指揮一人領軍防禦

按揚郡介江淮之間為南北襟喉東瀕大海鎮戍為難考其地形自東南蓼角嘴抵姚家蕩綿延三四百里除安豐等場在腹內不為要害要害之地乃通州也狼山也楊樹港裏河鎮也餘東餘西等場也蓼角嘴呂四場也掘港新開港也廟灣劉莊金沙場也其尤要者有三日新場出入至近逼近揚州也日北海所從以通新開港且有鹽艘聚泊也日廟灣為巨鎮而通大海口也

嘉靖二十三年因倭寇設海防道一人分守泰州參將一人分守通州如臯設遊擊一人中軍指揮一人管哨千戶四人勇士三千名掘港營設把總官

三十七年改參將為提督狼山諸處副總兵治通州統掘港周橋大河口守備把總等官

三十八年以倭平裁如臯城守遊擊改掘港把總為守備統東西二營

國朝順治三年題定掘港營經制守備一員把總二員

康熙元年增設如臯縣城守把總駐劄北極門范家橋海防道舊署年久盡圯後乾隆年間把總胡德錢朝爵先後捐貲置買賈家橋東劉家巷民房駐劄

雍正七年題定掘港本營馬兵拔補外委把總二員
十年改守備為都司隸狼山總鎮統轄
乾隆二十六年添設額外外委一員

分隸

康熙元年題定如臯縣墩汛分隸狼山鎮標中左二營及
京口協標水師左營
城守營狼山鎮標中營把總一員駐劄城內協防外委一
員駐劄北郊立發橋城守營統兵一百十五名內派馬戰
兵二人在縣北門外遞報文移步兵一百十三名分派沿
河各汛所轄墩汛計二十處每汛派兵五人
城內遊巡兵十名四城門及縣西神廟共五處二十八人

東路十里墩二十里三十里四十里五十里六十里七十
里凡七處

西路十里墩二十里三十里共三處

按三汛向係泰興營派兵防守乾隆二年改歸如臯城
守營

北路十里墩二十里三十里立發橋汛界牌汛共五處

按雍正二年奉文撥中營立發汛歸泰州營管轄至十
二年奉文仍歸狼鎮中營管轄

北路自北門至界牌大河西南與泰州營及泰興營分界
東路自東門至七十里白蒲汛止西南以大河中流與左
營汛交界東北以大河中流向內田二百步與掘港營交

如皋縣志 卷十一
界西路三墩西以絡麻河與泰興營交界東南以中大路
分界東屬左營西屬中營再自中大路南至石莊鍋廂港
與左營石莊汛交界南路以南門外地藏寺與左營石莊
汛交界

石莊汛狼山鎮標左營額設把總一員分汛石莊鎮西北
東南四汛五洞口一汛白蒲河南一汛每汛派兵五名共
汛兵三十名

按通州志左營外汛石莊防兵二十五名若五洞口白
蒲河南二汛通州界

南沙汛京口協標水師左營調千總一員協防外委把總
一員派防百姓圩汛驚玩莊汛沈家圩汛沙揚莊汛楊家

莊汛冒家圩汛李家圩汛每汛派兵八人共汛兵五十六
人

海防

營堡掘港營縣東一百三十里距海大洋五十里東南北
三面環海爲倭寇首犯要地

明洪武初信國公湯和設土堡一座周圍二百七十五丈
五尺每歲汛期委揚州衛提督指揮一員領軍一千三百
名守堡防禦天順間挑選精壯入衛京師止存軍五百五
十名

嘉靖中巡鹽御史崔議包磚工料銀貯庫旋因倭變支借
糧餉工遂輟土堡日益傾頽

如皋縣志 卷十一
三十二年倭夷大舉入寇再被蹂躪巡撫都御史鄭曉奏
設把總

三十八年巡撫都御史李鏐奏改守備統東西二營召募
民兵三千餘名設戰船一百餘隻後經承平滅汰軍籍存
水陸官兵六百餘名

萬曆十九年倭犯朝鮮沿海增備復召精勇千餘設戰船
六十隻增置馬步軍五百六十有奇事平旋罷存水陸營
兵四百名沙船八隻戰馬二十二匹所轄汛地南至石港
北接丁美舍西達如臯東抵大海洋

三十五年守備趙庭呈請海道張發銀四十兩修堡稍完
後風雨剝蝕傾圮如故守備趙千駟申詳仍議包磚不果

行時拼茶石港角斜李公堡皆有土壘歲久盡傾所存惟
空址耳

守備軍署棗門三間儀門三間大堂三間川堂三間樓三
間軍幕三間后土祠三間兵器庫二間馬廄三間軍廂二
十二間

國朝雍正十年改守備爲都司

乾隆四十五年都司王良駿詳造藥局三間土堡一圍周
圍一百七十五丈零照壁一條

五十二年都司黃振詳修二堂三間軍幕三間武庫三間
東西班房六間官廳三間箭廳五間廚房二間馬廄二間
戟門三間頭門三間

嘉慶元年署都司毛文欽詳修大堂三間上房三間軍裝樓十間

東營戟門一間廳三間堂三間左右廂七間

西營戟門一間廳三間堂三間左右廂十一間今俱廢

軍解八間萬歷四十一年守備管大藩建今亦廢

演武廳正廳三間川堂三間校屋三間舊設營中守備馬

紹援移建今惟存廳房三間餘屋皆廢

墩臺明時沿海通潮泊舟之所壘土為墩凡十臺

自石港營沿海東二十五里彭家竈墩高三丈五尺週

二十五丈相連蟹子窪港離洋十五里東南草蕩沙地

西北糧田

又東十八里曰方前墩高四丈週二十五丈相連方前

港離洋十里東南草蕩沙地西北糧田

又東七里曰寨前墩高四丈週二十五丈相連陳家

港離洋十里東南草蕩沙地西北街市

又東十五里曰新團墩高三丈五尺週二十四丈相連

川腰港離洋五里四面皆燒鹽草地

又東北十五里曰長沙墩高三丈八尺週二十五丈相

連川沙窪港離洋十里東南北皆草蕩沙地西糧田

又北五里曰火燒苴墩高三丈五尺週二十五丈相連

挨沙橫港離洋八里東南北皆草蕩沙地西糧田

又西北八里曰唐家苴墩高四丈週二十六丈相連唐

家渫港離洋七里四面皆草蕩沙地

又西十里曰尹家堡墩高三丈五尺週二十五丈相連沙魚窪港離洋七里東西北皆草蕩沙地南糧田

又西十里曰白沙口墩高三丈六尺週二十七丈相連灣港及黃沙洋港離洋十里四面皆草蕩沙地

又西十里曰豐利墩高三丈八尺週三十丈相連甜水港離洋十五里東西北皆草蕩沙地南糧田迤西北十八里接拼茶場入泰州界

國朝順治十六年增置墩臺十五座知縣李振奇監築其在掘港者九曰大洋稍墩曰漫竈墩曰高墩曰南坎墩曰川水窪墩曰北坎墩曰田家園墩曰謝家竈墩曰楊家坂墩

在豐利者六曰三總墩曰八總墩曰十三總墩曰十八總墩曰二十三總墩曰二十八總墩

按明制凡墩撥營軍五名管領黥徒舉號傳烽所以偵瞭海洋警息也沿海亭戶與拘蜆勾蠅之氓遇風潮猝至無所依阻則赴墩而逃生其所全活者多矣後之君子任修築者於丈尺之高廣增之則更於民生有裨矣分汛明制南汛石港狼山北汛拼茶角斜李家堡西汛馬塘丁堰如臯東汛大洋海

按石港岸高潮小港口悉爲淤沙壅塞船不可泊人亦不可登間於七八月風急潮高或乘勢可入若拼茶角斜李家堡三寨雖地居肘腋而實出掘港之背俱非安營

善地惟本港方前舊址水草兩便宜置砦於此循港而前陳家丫川腰等十餘處俱係津頭丫角亦應設兵防汛若舉其最險者又有東凌港埃沙橫南北坎此尤獨若大洋之兩頰也坎中有小市民居可以聚眾蓄威乘機夾擊至於拚茶角斜李家堡止堪後應難委前鋒度勢相形臨時制變未可膠柱論也

國朝陸汛九處何家環墩汛馬塘墩汛曹家墩汛岔河墩汛雙店墩汛石家店墩汛豐利壩墩汛豐利場墩汛西場墩汛海汛墩臺十七處李家堡墩汛大洋稍港墩汛陳家丫港墩汛川腰港墩汛東凌港墩汛川水窪港墩汛埃沙橫港

墩汛唐家蝶港墩汛沙魚窪港墩汛甜水港墩汛黃沙洋港墩汛洋南港墩汛萬家港墩汛唐家港墩汛川港墩汛木椿港墩汛拖魚港墩汛

按以上陸汛海汛俱係把總外委崙管巡防

兵額

國朝順治元年原額兵二百五十名內馬戰兵十三名步戰兵五十七名守兵一百八十名於康熙二十四年為海氛既平等事案內奉撥狼山鎮標三營哨船六隻戰守水兵八十四名於康熙二十九年奉裁哨船三隻并隨船戰守水兵四十二名撥歸京口營又於康熙三十三年為欽奉

上諭事案內奉裁守兵三名又於康熙三十五年為欽奉

上諭事案內奉裁汰步戰兵三名又於康熙三十六年為欽奉

上諭事案內裁汰守兵三名步戰改充守兵三名又於雍正二年

為欽奉

上諭事案內調撥太湖營步戰兵一名守兵一名又於雍正五年

為請

旨事案內調撥青村營守兵三名又於乾隆四十七年為遵

旨事案內奉裁撥壽春鎮標守兵一名計裁汰兵九十二名實存

兵二百四十二名內馬戰兵十三名步戰兵三十六名守

兵一百五十一名哨船三隻內捕舵繚旋兵十五名守糧

水手兵二十七名

會哨明制官兵四百員名沙船八號戰馬二十二匹分為


水陸二枝更番會哨其東西二營備倭官軍五百六十二
員名於內挑選精壯一百名充選鋒又選慧捷者四十名
充偵瞭又選在海年久慣識沙脉淤岡港汊深淺者六十
四名分入八船每船八名撐駕點水指引嚮導餘存三百
七十八員名防守營堡其石港拼茶角斜李家堡四寨每
寨官一員軍五十名仍駐本寨防守水兵一百八十八名
分為左右二哨左哨哨官一員帶領沙船四隻捕兵九十
四名駐劄北洋唐家渚等港與拼茶寨會哨右哨哨官一
員帶領沙船四隻捕兵九十四名駐劄南洋陳家了等港
與大河營會哨陸兵一百八十八名分為前後二哨委總
哨官一員駐劄沿海要地南坎北坎長沙古壩新團唐家

直等六處每處各撥隊兵三十名巡哨


國朝設哨船三隻每年四季派官兵出洋巡哨都司把總輪流更換出洋南至大洋稍港與狼山右營巡洋官兵會哨北至王家港與鹽城營巡洋官兵傳箭會哨

兩哨把總二員陸汛把總每另派巡兵六名各帶本身器械南至孫家窪交界地方與狼山中營遊巡兵丁會哨北至西場交界地方與泰州營遊巡兵丁傳旗會哨海汛把總每月派巡兵六名在於海汛地方梭織遊巡與狼山右營遊巡兵丁傳旗會哨

掘港營圖



軍政



江防

明萬歷四十八年設安民營於南沙從知縣李衷純之請也

臯邑南臨大江東連巨海固廣陵東境之要害也嘉靖
 以來掘港設守備專制沿海置烽墩列旌干星聯碁布
 隱然稱巨鎮焉至於江洋沙洲牙錯摩訶山之北地最
 險僻曲港深蘆潛為盜藪往往駕戈船恣剽掠雖東有
 狼山總兵之防西有黃港游擊之扼聲援徒嚴飛帆莫
 及有望洋悼嘆而已況邑所藉以資萬一者南沙稻田
 沙洲孤懸江汭每遇秋成羣盜烽起如薛良金顧凱兄
 弟率黨千人嘯聯巨艦殊難馴服知縣李衷純憂之力

如皋縣志 卷十一
請當事創安民營於三角網口之間其制準沙田之數
歲起餉一千六百餘兩募兵百人造船四隻統以鎮撫
一員游徼江中遇警援勦由是大盜屏迹天啓中江潮
衝齒稔植飄沒籽粒維艱兵餉無措知縣王珍錫曰沙
田所出幾何既徵籽粒千金又出兵餉一千六百餘兩
一指之大幾於股乎且兵多逃散船隻朽敗去之爲便
議者以爲前因寇作而建營安知異日不因營撤而寇
復作乎請自以石莊港巡檢鎮攝之沙洲原屬巡檢汛
地且內有復存沙兵二十名合之弓兵共五十名船一
隻營房一所其糧餉衣裝火藥之具止令田主給銀三
百兩統歸巡檢責令水陸兼緝歲且省千金矣沙民無

重課之苦地方無竊發之虞而李尹翺置之怠不致盡
廢是固變置之一法也

崇禎間沿江盜起知縣王崑生召募沙兵復還安民營舊
制

按各港民船挂號立功更番巡緝寓兵於民民稍安集
申酉之際人自爲將列艦聯營略無節制如兵部尙書
解操江誠意伯劉船由石莊過江爲盜所劫解父子相
抱投江死總兵許大成哨戰船數百由臯之龍游河入
江行至楊花橋爲張爾明拒敵船盡爲所焚大成敗走
揚州

國朝定鼎安民營副將朱大統游擊胡維寧首先効順率衆

如皋縣志 卷十一
來歸又爲沙洲民聚衆盡擣其營朱胡兩鎮撫闔門六十餘人同日遇害

順治三年巡撫陳蕩滅叛亂餘氛江海悉平

十六年海鯨犯京口登南沙掠石莊鎮以去

十八年海鯨萬艘入寇蔽江而下直抵金陵沿江村堡居民無噍類知縣李振奇奉憲檄建立墩臺十七座設兵戍守題奏撥狼山鎮標兵分番巡哨撥千總一員鎮石莊其南沙圩田盡行棄置沙民悉遷內地安插

康熙三年遣內大臣每三月一巡江海

八年裁去三墩存十四墩營防港宋家圩冒家圩下陰沙天生港朱家圩張家圩瓦廟港丁家圩余家圩石家圩沈

家圩李圩百姓圩

九年南沙漸漲接壤陸地遣大臣蘇宜會同總督踏勘南沙召民復業免課五年沿江設立墩臺之地屬江南江陰縣黃田港總兵分兵汛守而以石莊鎮內地仍屬江北狼山總鎮標下轄焉其防江之制始大備云

歲餉明嘉靖年間掘港營兵餉每年該銀四千六百四十八兩四錢九分九釐九毫九絲六忽續加春秋二季操賞銀二十五兩二錢六分六釐五毫東營備倭軍三百一十名每名日支銀八釐每年共銀八百九十二兩八錢西營備倭軍二百五十名每名日支銀八釐每年共銀七百二十兩兩營共餉銀一千六百一十二兩八錢續又奉文加

如皋縣志 卷十一
春秋二汛八個月每名日增銀七釐東營增銀五百一十二兩一錢二分西營增銀四百一十二兩兩營共增銀九百二十五兩一錢二分統計餉銀七千二百一十兩六錢八分六釐四毫九絲六忽

國朝每年額設俸餉養廉馬乾銀四千三百十九兩九錢九分四釐都司歲支俸薪銀一百四十一兩三錢九分四釐養廉二百六十兩把總二員歲共支俸薪七十二兩每員每歲支養廉銀九十兩兩共支銀一百八十兩外委把總二員仍支馬戰糧餉每員歲支銀十八兩共銀三十六兩額外委一員仍支馬戰糧餉馬戰兵十三名每歲共支銀三百一十二兩米四十六石八斗步戰兵三十六名每

歲共支銀六百四十八兩米一百二十九石六斗守兵一百五十一名每歲共銀一千八百十二兩米五百四十三石六斗哨船三隻捕舵繚旋步戰水兵十五名每歲共支銀二百七十兩米五十四石水手守兵二十七名每歲共支銀三百二十四兩米九十七石二斗又馬二十一匹歲共支銀二百六十四兩六錢以上每年共計銀四千三百十九兩九錢九分四釐米八百七十一石二斗內夏秋二季本色米四百三十五石六斗春冬二季折色米四百三十五石六斗每石折銀七錢五分共折銀三百二十六兩七錢

火藥鉛斤額數每年額用鎗砲火藥一千三百零八斤額

用鎗鉛六十六斤額用砲鉛四十六斤零八兩

防倭

明洪武十六年倭寇金鄉上召信國公湯和築沿海五十
九城

按日本古倭國地在中國之正東方數千里有五畿七
道附庸國百餘小者百里大者五百里詳馬貴輿文獻
通考

永樂十七年倭船至王家山島傳烽沓至都督劉榮率精
兵疾馳入望海埭賊數千人分乘二十舟直抵馬雄島進
圍望海埭入櫻桃滙榮合兵圍而攻之斬首七百四十二
捕生倭八百五十七榮封廣寧伯

按倭之寇大嵩桃渚也焚劫官庾民舍掠少壯掘塚墓
束嬰孩竿柱上沃之沸湯視其啼號拍手笑樂捕得孕
婦忖度男女剝視中否爲勝負飲酒荒淫穢惡有不可
言者積骸如林流血成川於是下詔備倭命重師守要
地增城堡謹斥堠修戰艦令兵分番屯海上

嘉靖元年罷海洋市舶

按市舶之罷因倭國入貢僧瑞佐之亂也於是利權在
下奸豪外交內訶汪五峯徐碧溪毛海峯之徒皆華人
稱王諸島攻城掠邑劫庫縱囚勢遂猖獗

三十三年春倭寇四十餘人犯縣邑人奔潰主簿閻士奇
督勇兵追勦獲賊首三級賊又寇北極門閻仍率兵禦之

如皋縣志 卷十一
吏吳位獲賊首一級夏四月倭數百人屯海上更番劫掠
巡鹽御史黃國用命儀真守備張壽松禦之巡撫都御史
鄭曉命守備楊縉戍如皋壽松觀望不進縉提兵獨往兵
陷淤淖中敗績奔賊追及縉縉躍馬抽矢射渠魁殺之賊
退五月倭劫東陳鎮主簿閻士奇率鄉兵截殺獲銅佛郎
機二架運司判官馬崙勦倭無功縛阜平民李漢爲從倭
殺之倭百餘人突至蔣婆舖時無城郭縣幾陷徐州兵備
李天寵率所部兵策應遇敵接戰部陣嚴整倭深入中軍
李督兵奮斬首級九顆生擒一人賊奔入海縣賴以全巡
撫鄭曉奏擢李爲都御史改撫浙江增知縣陳雍二級俸
暨主簿閻士奇各欽賞銀五兩掘港場禦倭指揮使張明

化失事充軍

按是年提督張經兵備李天寵有王江涇之捷時趙文
華以海寇猖獗請禱海神遂遣文華行禱公私勞費不
貲再出監軍漁獵官庫富家金寶書畫數百萬以敗爲
功以功爲罪忌張經李天寵遂奏天寵逮詔獄論死西
市自後賊益熾縱橫出入十六郡淮東温台江北淮揚
尤被其害

三十六年四月倭九十餘人至白蒲鎮焚劫兵備副使馬
慎率所部兵圍于陳家莊兩日斬首三十餘級賊窮奔天
生港食盡知縣陳道遣土兵夾戰斬首二十餘級五月倭
六十餘人至白蒲丁偃林梓等鎮芹湖等莊所過焚劫殺

傷鄉民逃竄閭里蕭然卽抵城下四面攻圍知縣陳道主簿葉夢麟砌門嚴守賊退論全城功欽賞銀五兩是年倭賊屢寇掘港等場巡按御史馬斯臧奏備倭把總韓德貞失事充軍

三十八年四月一日倭奴大舉入寇千戶王良呂雄死之九日賊薄城下海防兵備副使劉景韶仗劍臨城督署印通判姜壽固守仍同游擊邱陞陳兵東門奮斬賊首十七級生擒二人賊退據龔家莊總兵鄧城發兵與戰交鋒卽奔賊乘勝長驅臯民被害一千餘人城以失律論斬十四日邱陞與賊戰海安鎮西曹家莊斬倭首一百二十級邊兵亦損四十餘人殘寇盡爲陳忠斬獲二十一日邱陞圍

賊於縣西周宣莊敗績二十八日劉景韶邱陞追倭賊至泰興縣新沙斬賊首九十顆六月推游擊邱陞爲揚州參將二十七日劉景韶邱陞與倭戰於西場仲家莊斬首二百級守備楊縉亦斬首二十級二十九日劉景韶邱陞窮追倭賊陞力戰死之劉景韶躡倭盡殲之於劉莊場

按三十三年甲寅倭由掘港焚掠至馬塘叢家壩屯聚丁堰鎮且逼縣官民震駭逃匿一空時縣令欲自逸有宗掾者倡禦敵之說吳孟二掾以弓馬從之堅請令及簿尉出戰閻簿朱尉率兵四百餘簿奮勇殺賊三人生擒一人口漸昏黑賊爲奪氣去使是時尉不退怯與簿并力四十餘寇可無孑遺則倭之首挫於臯者閻簿之

如皋縣志 卷十一
力也寇之再至真倭居多時兵備李天寵適率師過臯
凡殺十二人生擒一人賊乃奔潰又鹽丁史玖死戰之
力也乙卯丙辰累逼臯城則以城守可恃鄭中丞之力
也已未大衆聲言入郡取道臯城外繞四門長驅而西
不敢少留則參將邱陞之力也時有浩秀者以勇著軍
中單身步戰慣用馬叉戳倭所向披靡一日合戰值有
密雨灑濕刀劊戳倭仆地刀澁不及出爲衆倭所執遂
成齏粉民間至今猶唱嘆其功

又按三十八年己未夏四月倭寇通州撫軍李遂馳出
如臯與賊遇於白蒲諸將言宜及賊未定擊之撫軍曰
戰貴得地賊方銳而我師未嘗見堅敵今軍中敢言戰
者斬已賊益進撫軍謂諸將曰賊過如臯必且合合則
道有三自泰揚通天長鳳泗卽臯陵驚道最要自黃橋
逼瓜儀搖南都而梗漕次之若從富安而東濱海荒涼
擄掠無所獲至廟灣絕矣則吾得地時也時唐職方順
之視師海上倭犯馬邏職方則以輕車趨馬邏合於軍
曰擊來船一勝擊去船十來船皆真倭而力聚去船脅
從而衆分擊來船者除根銷萌擊去船者雖勝之而吾
民殘矣益發兵擊來船斬獲首虜數百賊敗逐之與撫
軍兵合遂相與部勒諸將使過賊令毋得逾天長瓜儀
而二帥以青沂邳卒當泰州之衝令海防游擊躡賊行
書稍近使不得休夜稍却以杜其後必致賊廟灣於是

賊果向廟灣撫軍以間夜入淮安城督戰會賊之攻丁堰攻馬邏者皆敗而聚廟灣固守巢堅且險撫軍調諸路兵畢集與賊方分兩翼躬冒矢石遂破賊於廟灣已三沙賊復入又連破之俘斬萬數餘賊遂平

又按兵備劉景韶請於李撫軍遂自如臯北抵掘港皆列水陸戍三十八年倭大上前鋒犯如臯景韶單騎赴之敕吏士開門以待呼諸將歃血而盟書其名於服曰是戰也不利我必死之諸將人人奮勇會賊據白蒲意欲西公計給之東而遣諸將據丁堰爲三覆躬率兵犄之又策廟灣重地請於撫軍以大軍軍焉而身尾賊殲其殿於潘莊賊驟西與遇於余莊復敗之遂敗賊於馬

邏復尾賊於燕莊賊且犯泰興公追之泰興民爭挽公謂急入保赤子賴公而枕公笑曰城以外非赤子耶且吾在何虞城麾兵前擣賊張家莊走之以撫軍檄會兵於廟灣合戰凡四日大敗賊所鹵獲功與撫軍當諸將欲置酒高會公曰未也夫三沙之賊不懲南而懲南之颶也勢且趨我彼覩夫不利北必懲我而我徂之非勝算也未幾三沙倭果北渡徑趨如臯公率諸將分道進掩之於仲家園蕪其衆賊走鍋團與參將邱陞追及之陞突前中伏死公併將其兵力戰敗之已戰於小海灘已戰於劉家橋已戰於白駒海沙各有斬獲賊窘悉衆趨劉莊食其粟當是時三沙之裨將劉顯以失律罰自

效公器其才力悉中權之勁畀之曰請以賊爲若德顯奮而前公鼓之賊巢潰追殲之於白駒場殆盡是役也公前後不解甲者三月餘生獲百斬首三千焚溺稱之

鹵夷器輜重以萬計

見王世貞弇州山人續稿


蒙童吉記自遼陽守將劉江敗倭寇於櫻桃園之後不敢犯順者幾二百年矣嘉靖壬子東南又受荼毒而淮揚尤甚天子軫念畿輔重地特簡白川劉公以浙江副使拜命茲地運籌布策井井有條己未夏倭連艘數千餘入寇破通州副總兵於水上遂薄如臯西窺淮揚勢如風火公誓諸將奮不顧身親勒部陳一捷於丁堰再捷於東門賊乘夜循海而趨廟灣軍門李公遂大破之

此蓋初至之賊云旣而江南逸賊秋初復犯通州公乃選輕車數百扼臯之汊河以斷賊西向而自以其兵同邊將邱公待賊於西場少頃賊果趨西場公命騎兵張兩翼以衝其腋而以大砲摧其中俘斬者三百有奇賊遂奔入仲家園公進圍越三晝夜缺其一而賊終不敢遁凡斬大酋長以下千五百二十七終生虜十五人餘黨殲於劉莊迄無噍類海邦賴以安堵蒙吉以公務至西場見路東有碣題曰劉公平倭塚蓋場之人倣古京觀萃倭賊骨而封之以識公功也蒙吉詢諸父老津津道公滅賊狀夫西場之捷其己未成功之尤者乎蓋勝之丁堰諸處者至西場而後赫其威殲於劉莊者在西

場已先禡其魄而西場之得名與櫻桃園一轍矣然櫻桃園一捷而倭奴不敢犯華者二百年則斯捷也又焉知不可保數百年無虞矣乎公爲人沉毅而智慮絕人師行尤有紀律不擾民間一草一木而以休養撫循之意寓於師旅饑饉中故民之肖像以生祀公者無間遐邇在海安鎮則祠在泰州則祠在如皋則祠在寶應則祠之老成厚重似趙克國忠義精誠似郭汾陽仁和謙謹敬禮士夫下吏似曹彬豈劉江可同日語哉於戲自倭犯中國未有能一大創者公以文墨儒紳義激於衷率興師撻伐橫厲島夷前後折馘約三千有奇銘紀旂常

有國史氏在蒙吉何能與焉

海防圖附



女真縣志 卷十一
綏寇

宋太平興國間楊允恭督水軍擊海賊於通州

賊維巨舟數十張幕其上柁樓發勁弩短炮允恭兵刃所向多爲幕所縈炮傷允恭左臂流血及袂允恭氣彌壯以繩聯鐵鈎命善泅者擲壞其幕士卒爭進賊墮水死生擒數百人

治平二年富弼以使相判揚州常駐兵豐利場以備海寇其戰艦每壞於風濤弼因鑿灘以泊之且使軍士習水戰於中臯人呼曰鄭公灘

元至正十五年白駒場亭丁張士誠起兵陷通泰高郵

按士誠以操舟運鹽爲業緣私作奸頗輕財好施得羣

輩心常鬻鹽富家富家多凌侮之或負其值不酬丐手邱義窘辱士誠尤甚士誠忿卽帥壯士李伯昇等廿八人殺義滅諸富家焚其居入旁郡場招少年起兵陷通泰高郵元右丞相脫脫總大軍出討數敗士誠樞密判官董搏霄奪士誠德勝湖砦招募善水戰者五百人勦平北沙廟灣沙浦等砦俄順帝以讒解脫脫兵柄命他將伐之士誠乘間奮擊元兵遂潰

明萬歷三十八年海盜犯掘港守備管大藩滅之遂築海隄與民休息

邑人冒日乾記國家陳師滅貊廓清三韓撻伐之威震陷海外於是振旅除戎樹干城於津梁之上以紓東顧

乃以彭城管公守掘港蓋簡昇也掘港處廣陵之東偏
傳海北引青萊南控吳越為嶠夷出沒之衝稱巖鎮世
廟時數中寇遂宿重兵其上而以一將守之得以軍興
法從事然窮海網濶去郡邑遠而俗羯羶不易馴魚鹽
蜃蛤之利五方鱗集囂訟易起地斥鹺苦潮患民鮮蓋
藏青幘白矛之徒操鯨皇濺沫鯨波其小者探丸肘篋
萑苻之警時聞詰戢鳩撫他將往往難之公至稽尺符
覈侵牟簡營伍謹斥堠一軍凜然精彩皆變而盜不得
發卽盜發責主檄者捕常滿品已酉庚戌盜鳴榔海上
公親鼓舟師殲之公治軍嚴使卒稟功令惟謹鮮譁者
卽一二猾少年與黔首齒而束矢質於庭公以三尺繫

之不阿所好其他以微隙或修宿讎株引無已時務曲
爲解媯各厭其意去人讐且愧之告訐之風益衰公身
先士卒與同甘苦軍市租悉以饗士寒無襦者爲之挾
纊而尤詢民所疾苦噢咻之良方卑形家言不利鹺廩
通渠潮汝注之若沃雪焉范公隄久而爲陽侯嚙不潰
如縷公次第增築之屹然并峙而更以餘力新泰山祠
爲元元祝禧焉客某以邑中逮懷金屬公解介戲下卒
以間微白狀公立答卒逐之其矚然不滓如此公名大
藩彭城人以指揮使舉進士

國朝順治二年夏五月前明知縣李丹衷逸去亂民陳君悅
等結立中營櫻城自守六月陝西解元馬御輦奉

命來令臯邑悅等乘夜襲殺之并前典史王家瓚秋七月巡撫趙福星檄揚州總兵張士忠守備孟三澗及委署知縣朱邦政統兵取臯賊棄城走九月賊首徐健吾妖道王耀等糾衆萬餘攻城邦政力禦之會

大兵至賊乃遁冬十月徐健吾就擒陳君悅等伏誅沿海悉平盧志定亂始末故明興平伯高傑據揚州四月十八日邑中風聞高兵欲東下空城遠遁越三日兵不果來民甫安業五月亂賊陳君悅等號召天罡黨數百人立中營挾制舊令李丹衷威令皆不行洎故明總兵許大成來自揚州賊奉爲主帥日以助餉考勒邑富戶縣令挂冠去僅留典史王家瓚中營擁之主縣事六月初二日

陝西解元馬御輦以我

朝命來令臯邑悅等乘夜襲殺之并殺典史王家瓚據城自守七月初四日撫臣趙福星發揚州總鎮張士忠守備孟三澗統兵千餘同委署縣尹朱邦政取臯賊棄城遁去邦政遂主縣事下令詔撫遠近民始還故處七月十五日中營賊圍城一日尋殺退先是我

朝大兵至海安時有李家堡賊首繆景先等拒戰海安邦政智敗景先擊殺之其弟鼎台聞景先死復糾沿海竈丁數千人立寨於縣之十三里港鄉勇誘之飲醉縛獻縣尹磔於市八月十五夜海賊來自城南竈兵北泰興灘兵西四面環攻縣尹統兵出城南北連戰隨敗去九月

十三日賊徐健吾統妖道王耀等萬餘繞城日夜攻擊
縣尹自暮達旦防禦不遺餘力親冒矢石與賊殊死戰
十八日

大兵至內外交攻殺賊無數賊乃遁十月十五日賊復至報
請泰與總鎮李星馳援勦賊亦退尋於是月之晦孔蘇
二總鎮擣其穴賊黨遂鳥獸散居民擒賊首徐健吾至
縣械送

京師陳君悅等俱伏誅邑始平

如皋縣志卷十一終

